

ZAPISNIK

sa 33. (trideset treće) sjednice Gradskog vijeća Bihać održane dana 24.05.2022.godine u Gradskoj vijećnici, s početkom rada u 10:38 sati.

Predsjedavajući otvara sjednicu i konstatira da je na sjednici prisutno 27 vijećnika., te da su svoje odsustvo opravdali svi odsutni vijećnici.

Predsjedavajući poziva vijećnika Igora Pečenkovića da položi svečanu zakletvu.

Predsjedavajući daje riječ sekretaru Gradskog vijeća Ibrahimu Begiću kako bi izvjestio o prestanku mandata vijećnika u Gradskom vijeću i dodjeli mandata sljedećem kvalificiranom kandidatu.

Sekretar navodi kako je Gradsko vijeće Bihać dostavilo je Centralnoj izbornoj komisiji Bosne i Hercegovine, dana 06.03.2023.godine, obrazac za utvrđivanje prestanka mandata izabranom članu tijela vlasti, propisno ispunjen od strane vijećnika Sedić Elvedina, te potpisan i od strane predsjedavajućeg Gradskog vijeća Bihać, a kojim je Sedić Elvedin, zbog izbora na funkciju gradonačelnika Grada Bihaća, dana 27.02.2023.godine, podnio zahtjev za utvrđivanje prestanka mandata vijećnika u Gradskom vijeću Bihać.

Odredbama člana 1.10 stav (1) Izbornog zakona BiH utvrđeno je da izabranom članu organa vlasti na svim nivoima prestaje mandat prije isteka vremena na koje je izabran danom podnošenja ostavke.

U stavu (2) naprijed navedenog člana je utvrđeno da Centralna izborna komisija BiH donosi odluku o prestanku mandata izabranom članu organa vlasti u roku koji ne može biti duži od 15 dana kada su nastupili razlozi za prestanak mandata, odnosno od dana saznanja o razlogu za prestanak mandata, i o tome obavještava organ vlasti u kojem je izabrani član imao mandat.

S tim u vezi, Centralna izborna komisija BiH je svojom Odlukom broj: 06-1-07-1-84/23 od 14.03.2023.godine, utvrdila prestanak mandata Sedić Elvedinu, vijećniku u Gradskom vijeću Bihać, izabranom na Lokalnim izborima 2020.godine sa liste političkog subjekta POKRET ZA MODERNU I AKTIVNU KRAJINU - POMAK, a po pravosnažnosti Odluke upražnjeni mandat je dodijelila **Pečenković Igoru**, sljedećem kvalificiranom kandidatu sa liste političkog subjekta POKRET ZA MODERNU I AKTIVNU KRAJINU - POMAK.

Nakon što je Igor Pečenković dostavio Centralnoj izbornoj komisiji BiH izjavu o prihvatanju mandata, Centralna izborna komisija je izdala Uvjerenje pod brojem: 06-1-07-1-84/23 od 23.03.2023.godine, kojim se potvrđuje da je imenovani dobio mandat vijećnika u Gradskom vijeću Bihać kao sljedeći kandidat sa liste političkog subjekta POKRET ZA MODERNU I AKTIVNU KRAJINU - POMAK.

Vijećnik Igor Pečenković položio svečanu zakletvu.

Usvajanje Zapisnika sa 32. sjednice Gradskog vijeća Bihać.

Zapisnik je usvojen sa 27 glasova „ZA“ – jednoglasno.

Za sjednicu je predložen *s l j e d e ć i*:

D n e v n i r e d

1. a) Prijedlog Odluke o utvrđivanju javnog interesa za nepotpunu eksproprijaciju nekretnina ustanovljenjem služnosti u svrhu izgradnje elektroenergetskog objekta priključnog podzemnog 10(20)/0,4kV kablovskog dalekovoda za TS 10(20)/0,4Kv „Podstrana 2“ i TS 10(20)/0,4kV „Podstrana 2“, grad Bihać u korist JP Elektroprivreda BiH d.d. Sarajevo, Podružnica „Elektrodistribucija“ Bihać.
- b) Prijedlog Odluke utvrđivanju javnog interesa za nepotpunu eksproprijaciju nekretnina – u svrhu izgradnje priključnog KB 10(20) kV voda sa TS 10(20)/0,4 kV „Zaobilaznica 5“ sa dva paralelna podzemna voda (Dionica KB 10(20) kV Dionica DV „Pokoj“ – TS „Zaobilaznica 5“) i (Dionica KB 10(20) kV TS „Zaobilaznica 5“ – TS „ Čavkunović“) Grad Bihać u korist JP „Elektroprivreda BIH“ d.d Sarajevo, Podružnica „Elektrodistribucija Bihać“
- c) Prijedlog Odluke o utvrđivanju javnog interesa za potpunu eksproprijaciju nekretnina u svrhu sanacije odrona i rekonstrukcije dijelova regionalne ceste R 403a,dionica Kamenica-Gata II, stac. km od 7+700 do 7+806 km u korist JU Direkcija regionalnih cesta USK.

2. Odluka o davanju saglasnosti na samoinicijativnu ponudu za dodjelu koncesije privrednom društvu „Green Water“ d.o.o Kulen Vakuf, Bihać za korištenje vode izvorišta Ostrovica u Kulen Vakufu radi njenog pakovanja (flaširanja) i prodaje na tržištu
3. Prijedlog Odluke o izmjenama i dopunama Odluke o davanju u zakup poslovnih prostora „Službeni glasnik Grada Bihaća broj: 15/17 i 12/19)
4. Prijedlog Odluke o utvrđivanju prosječne konačne građevinske cijene 1 m2 korisne stambene površine na području grada Bihaća u 2022. godini
5. Prijedlog Odluke o izmjenama i dopunama Odluke o regulaciji saobraćaja na području Grada Bihaća
6. Prijedlog Odluke o izmjenama i dopunama Odluke o Javnim parkiralištima na području Grada Bihaća
7. Prijedlog Zaključka o davanju saglasnosti na Pravilnik o radu JP“Aerodrom Bihać“ d.o.o.Bihać
8. Prijedlog Zaključka o davanju saglasnosti za davanje u zakup poslovne prostorije Kulturno umjetničkom društvu „BEDEM“ Bihać.
9. Prijedlog Zaključka o prihvatanju „Platforme za mir“ i „Plana aktivnosti za implementaciju Platforme za mir 2018 – 2022 organizacija civilnog društva“
10. Prijedlog Rješenja o utvrđivanju liste promjenjivih članova Komisije za koncesije Unsko – sanskog kantona za područje Grada Bihaća

na sjednici je usvojena dodatna tačka dnevnog reda :

11. Prijedlog rješenja o razrješenju predsjednika Nadzornog odbora JP „Aerodrom Bihać“ d.o.o Bihać
Prijedlog Rješenja o imenovanju na kraći period predsjednika Nadzornog odbora JP „Aerodrom Bihać“ d.o.o Bihać

Predsjedavajući daje na glasanje dnevni red.

Dnevni red za 33. sjednicu Gradskog vijeća Bihać usvojen jednoglasno sa 27 glasova “ZA”.

Aktuelni sat:

Vijećnik Alen Zulić

Koristi priliku da sve pozdravi, vijećnik navodi da uzimajući u obzir sve što se desilo u Gradu Bihaću (a najviše se tiče poplava) da se svi pokušaju usmjeriti na određena konstruktivna rješenja. Također navodi da sama činjenica koliko je stanje bilo loše može se kao usporedba uzeti stanje u pokrajini u državi Italiji, gdje je čak bilo i na desetine mrtvih preminulih osoba. Zato apelira kolegama da danas iznesu konstruktivna rješenja, a s tim u vezi naglašava da je upravo Gradinačelnik Sedić otputovao na sastanak u Sarajevo po pitanju pomoći za poplavljena područja/objekte u Gradu Bihaću, te će i klub POMAK-a u svoje prijedloge zasnivati na zaključcima koji se donesu na pomenutom sastanku.

Vijećnik Sulejman Kulenović

Vijećnik pozdravlja sve prisutne i navodi da posjeduje jedan video a vezan je za poplave koje su se desile na području Grada Bihaća. Problematika samog videa vezana je za mjesnu zajednicu Luke, koja uslijed svakih većih kiša ili poplava ima ogromne probleme.

Vijećnik Amir Kozlica

Koristi priliku da sve pozdravi i da obavijesti ovim putem javnost da više nije član političkog subjekta SDP-a , te da u klubu Gradskog vijeća ne djeluje više kao član istog. Također naglašava da svoj politički angažman nastavlja kao nezavisni vijećnik. Kako ne namjerava da se prestane baviti politikom, objašnjava da će u narednom periodu donijeti odluku gdje i u kojoj političkoj opciji nastavlja svoju političku karijeru. Ono što želi da istakne jeste činjenica da bi se članovi SDP-a trebali zapitati zašto je samo u ovom mandatu ovaj politički subjekt izgubio 4 pripadnika. Navodi da je prije određenog broja godina ova politička opcija imala čak i do 16 vijećnika, 7 kantonalnih poslanika itd. Također navodi da nije uredu da se članovi

ovog političkog subjekta na neadekvatan način ponašaju, a kao primjer navodi ponašanja koja su se desila za vrijeme poplava. Još jednom naglašava da svoj politički angažman nastavlja kao nezavisni vijećnik do konačne odluke.

Vijećnica Šeherzada Delić

Koristi priliku da sve srdačno pozdravi. Navodi da će u aktuelnom satu da se dotakne aktuelnih poplava i šteta koje su nanesene mnogobrojnim porodicama, institucijama i ustanovama, ali i građanima koji su nažalost u ovim trenutcima najgore prošli. Između ostalog navodi da smo kao grad i kanton zakazali u sprečavanju poplava koje su se desile čak dva puta u 6 mjeseci. Kao razlog toga navodi nemarnost, bezobzirnost, neznanje i nepoštivanje zakonskih odredbi koje su se nažalost opet najviše prelomile preko onih najsiromašnijih, a kako vijećnica tvrdi vlasnici betonskih vila uz duž obale rijeke Une koju su također betonirali, te na taj način učinili da se vodena masa brže i snažnije izljujeva imaju dovoljno novca da poprave uništeno. Smatra da će se i od pomoći koje smo dobili (po riječima vijećnice od Grada Sarajeva 40,000 KM, OD općine Centar – Sarajevo sa gradonačelnikom Srđanom Mandićem 90,000 KM, od Vijeća ministara 1,000,000 KM, od Federacija Bosne i Hercegovine 500,000 KM, od Vlade kantona Sarajevo – 2 šlepera interventne pomoći) prvi su se okoristili isti oni koji su betonirali obale rijeke Une. Vijećnica smatra da su ovo također krivci što su u gornjem toku rijeke Une u području Nacionalnog parka poplavljen Račić, Lohovo, Ripač, Orašac, Kulen Vakuf i Martin Brod. Oštećeni su također mnogobrojni objekti, vikendice i kuće za odmor kao i pojedini turističko – ugostiteljski objekti koji su izgrađeni nedaleko od obala rijeke Une, od kojih su prema službenim informacijama isti ovi objekti izgrađeni bez odgovarajućih dozvola za građenje. Koristi priliku da postavi pitanje da li imamo popis ovakvih objekata i njihovih vlasnika ?! Šta su učinile inspekcijske Službe u provedbi mjera njihovih nadležnosti ?! Koliko je ovakvih objekata srušeno ili za koliko objekata su izdana rješenja o obustavi radova , te da li su vlasnici objekata postupili po rješenju ?! Također pita da li Grad Bihać i inspekcije imaju neki plan za borbu protiv nelegalne gradnje? Vijećnica smatra da ova borba poprima elemente organizovanog kriminala zato navodi da je slobodna da upotrijebi izraz „građevinska mafija“ Traži izvještaj gradonačelnika o broju nelegalnih objekata sa svim detaljima koje je spomenula, a ako plan o borbi nelegalne gradnje ne postoji vijećnica ga na ovaj način inicira.

Vijećnik Adnan Lipovača

Koristi priliku da sve pozdravi, i da uputi čestitke novom vijećniku u Gradskom vijeću, kao i ministru Kemalu Hrnjiću, te im obojici zeli sretan rad. Navodi da će aktuelni sat iskoristiti da iznese određenu problematiku koja iako nije u nadležnosti Grada Bihaća, zaslužuje da se o istoj kaže par rečenica kako bi javnost bila upoznata, a u pitanju je registracija motornih vozila na Unsko -sanskom kantonu. Želi da apelira na nadležna ministarstva, na premijera ili bilo koga drugog da se agonija koja je u tijeku po pitanju ove problematike već jednom dovede do rješenja. Objašnjava da ukoliko bilo ko želi da registruje svoj automobil, a neko od radnika koji rade na tim poslovima je odsutan, onemogućuje vam se dobijanje papira o istom bar na 10-15 dana, jer jedan radnik koji ostaje nije u fizičkoj mogućnosti da sve to sam stigne da uradi. Upravo se kako vijećnik navodi na ovaj način gube i firme i radnici, jer su svi u nemogućnosti da registruju automobile, samim tim gube mogućnost rada.

Vijećnik Šefik Kličić

Koristi priliku da sve pozdravi, te da se osvrne na protekle vremenske nepogode koje su kao i u decembru prošle godine nažalost pogodile ista područja, što predstavlja svojevrsni fenomen. Smatra da se iz proteklih situacija treba izvući određena pouka, a nadležnim da rade u skladu sa zakonom kako bi se uspjelo pomoći apsolutno svim ljudima koji su nažalost oštećeni u ovim poplavama. Koristi priliku da uputi zahvale svim onima koji su prvi bili na terenu i dali sve od sebe kako bi pomogli unesrećenima. Također čestita kolegi Pečenkovići i ministru Hrnjiću.

Vijećnik Emir Mujadžić

Koristi priliku da sve pozdravi i da naglasi da iako je opet i u ovim poplavama njegovo vlasništvo poplavljeno, ne želi da aktuelni sat koristi za priču o poplavama. Želi da predloži da se svi vijećnici odreknu svojih paušala, barem do decembra mjeseca 2023. godine, jer su vijećnici državnici, a paušali su vanredni prihodi, a ova situacija je također vanredna. Također navodi da postoje na žalost naši sugrađani koji su poplavljeni, a ne posjeduju ni osnovne stvari kako bi očistili svoje kuće i zemljišta, a kamol i obranili isto od poplava. Navodi da svi imaju nešto da kažu, a još se novac od procjene štete poplave koja se desila u decembru nije isplatio sugrađanima. Navodi da ukoliko vijećnici odluče da se odreknu paušala do kraja ove godine, da će se on svojih odreći do kraja mandata. Također iznosi problematiku ulice Dr. Irfana Ljubijankića, ali i tende u centru Grada Bihaća, za koju se ne zna ni koje dao dozvolu da se postavi, niti ko je dao odluku da se ista skine. Također iznosi kritiku na račun

gradonačelnika jer vijećnik smatra da isti treba da prisustvuje apsolutno svakoj sjednici kako bi dao odgovore na pitanja na koja je dužan da odgovori. Navodi da se ulica Irfana Ljubijankića, trenutno asfaltira, a tamo su ukopane vodovodne cijevi i to od azbesta koje se ne mijenjaju, a to je proritet.

Vijećnik Hasan Fatkić

Koristi priliku da sve pozdravi, a poseban pozdrav upućuje kolegici Selmanović, koja je trenutno na liječenju, sa nadom za njen što brži povratak. Kolegi Pečenkoviću čestita na osvojenom mandatu. Za aktuelni sat odabrao je da priča na temu proteklih poplava koje su zadesile Grad Bihać, ali prije svega želi da naglasi da sjednice Gradskog vijeća nisu održane dva mjeseca, te da je sa tim prekršen Statut, kao i Poslovnik Gradskog vijeća, i da se to radilo sve dok interesna većina POMAK/SDA nije usaglasila svoje stavove. Iznosi kritike na račun gradonačelnika povodom njegove reakcije u stanju prirodne nepogode, navodi da gradonačelnik košta zajednicu oko 400 KM dnevno što je pola prosječne plate radnika koji radi na utovaru pijeska u vreće kada je stanje poplava. Navodi da je politički subjekt POMAK na vlasti već 6 godina u Gradu Bihaću, pa vijećnik smatra da su u tih 6 godina prvo trebali spriječiti divlju gradnju uz rijeku Unu i Klokot, jer su na toj temi rušenja bespravno izgrađenih objekata i dobili više puta izbore. Vijećnik smatra da se najveća divlja gradnja uz rijeku Unu desila upravo u proteklih 6 godina, te su se na taj način sužavala korita rijeka. Također navodi da se izgradnjom industrijske zone Kamenica uništilo sabirno mjesto za vodu, što je rezurtiralo i plavljenjem rijeke Klokot 2 puta u 6 mjeseci. Iznosi kritike i na račun gradske inspekcije i njihovog rada, što objašnjava postavljanjem tende u strogom centru Grada Bihaća, koja je nakon pritiska javnosti u uklonjena. Navodi da Grad Bihać nije uradio ništa kako bi zaštitio građane Bihaća.

Vijećnik Zulfikar Handukić

Pozdravlja sve prisutne, i kako kaže koristi priliku da podsjeti vijećnike na sjednice koje su održane, jer kako navodi određeni vijećnici imaju problema sa demencijom. Navodi da je Gradsko vijeće Grada Bihaća u martu mjesecu održalo 2 sjednice i to 14.03.2023.godine i 27.03.2023. godine, također smatra da je od velike važnosti da se napomene da smo imali i mjesec Ramazan, te da je u tom mjesecu Kolegij Gradskog vijeća donio zajedničku odluku da se što više pokuša minimizirati rad vijeća. Napominje da samo u mjesecu aprilu nije bila zakazana sjednica, ali su u martu bile održane dvije.

Vijećnica Almira Seferagić

Koristi priliku da sve skupa pozdravi. Želi prije početka da zamoli Predsjedavajućeg da joj dozvoli malo više vremena, jer je tema jako bitna, a svi smo nekad bili u rukama tih žena. Vijećnica navodi da je 12.05.1820. godine u Firenci rodila se žena koja je svojim radom promjenila odnos prema sestrinstvu. Ta žena je Florens Najtingejl inače osnivačica jednog od najhumanijih poziva sestrinstva. Njen rođendan obilježava Međunarodno vijeće medicinskih sestara, baš zbog toga taj datum 12.05. obilježava se svugdje u svijetu kao Međunarodni dan medicinskih sestara tehničara. Ovogodišnja tema naših poziva su „naše medicinske sestre – naša budućnost“. Vijećnica navodi da komora medicinskih sestara – tehničara Unsko – sanskog kantona kao i svake godine svečano obilježava ovaj dan i to sa održavanjem stručnog simpozijuma koji se ove godine održao u Domu zdravlja Sanski Most. Između ostalog vijećnica kaže kako je iz svih javno – zdravstvenih ustanova kantona prisustvovalo preko 130 medicinskih sestara – tehničara. Koristi priliku da se osvrne na činjenice da se medicinske sestre – tehničari u svom radu susreću sa brojnim izazovima, iako su uslovi za rad sigurno bolji nego ranije daleko su od dobrih. Isto kao što i zahtjevi i prava pacijenata često znaju biti ugrožena. isto se dešava i sa zahtjevima i pravima medicinskih sestara – tehničara. Vrlo često pošto su svakako medicinske sestre – tehničari prvi u kontaktu sa pacijentom isti postaju meta verbalnih okršaja koji ne rijetko postaje i fizički okršaj radi nezadovoljstva pacijenata/ ili njihove pratnje. Kao primjer za ovo vijećnica koristi situaciju koja se nedavno desila u Domu zdravlja Velika Kladusa kada su medicinske sestre dobile lakše tjelesne povrede, jer su isključivo radile svoj posao. Upravo zbog svega navedenog vijećnica koristi ovaj aktuelni sat da upozna i vijećnike i javnost da je Komora medicinskih sestara – tehničara na Unsko – sanskom kantonu pokrenula inicijativu da se medicinskim sestrama – tehničarima dozvoli status službene osobe, radni mnogobrojnih nadležnosti koje imaju u svom poslu. Upravo zbog tog vijećnica se osvrće na činjenicu da je nemoguće osnovati dobar zdravstveni sistem bez edukovanih i kompetentnih i kredibilnih medicinskih sestara – tehničara, jer ipak ti ljudi čine 52% uposlenika zdravstvenih ustanova. Također koristi priliku da kaže da je Svjetska zdravstvena organizacija dala nekoliko preporuka u razvoju sestrinstva, a koje se naravno tiču ulaganja u obrazovanje, zapošljavanje većeg broja specijaliziranih medicinskih sestara – tehničara i tako dalje, zato želi da naglasi da ova profesija ne želi nemoguće, ali očekuju da budu ravnopravni članovi medicinskog tima sa svim svojim pravima i obavezama. Kada su u pitanju poplave vijećnica želi da zamoli kolege vijećnike da se ne prebacuje krivica sa jednih na druge, jer ona smatra da će se svima moći i uspjeti pomoći ukoliko svi budu ljudi i ukoliko ne bude politizacije ovakvih tema.

Vijećnik Nijaz Malkoč

Koristi priliku prije svega da sve pozdravi. Navodi da se zbog ne čuvanja prirode i rijeke Une dešava uopravo ovo šta nam se desilo. Želi u svoje ime da se zahvali svim institucijama u Gradu Bihaću koje su bile aktivne u ovim poplavama, a koje su itekako bile bolje organizovane u ovim poplavama, nego u svim prijašnjim. Također koristi priliku da se zahvali Civilnoj zaštiti Grada Bihaća na jako dobrim aktivnostima, kao i gradonačelniku, svim organizacijama, dijaspori, kao i svim aktivistima Grada Bihaća koji su došli da pomognu našim građanima kada im je bilo potrebno. Zahvalu također upućuje i vijećnicima i zastupnicima sa različitih nivoa koji su se uključili. Navodi da ga je sramota biti gradski vijećnik pored nekih ljudi u Gradskom vijeću Bihać, koji nemaju nikakvih aktivnosti. Navodi da cijelo područje Grada Bihaća plavi i da svi vijećnici moraju imati aktivnosti, moraju govoriti, a prije svega moraju izaći među građane i istima pomoći. Koristi priliku da se zahvali JP „Vodovod“ d.o.o Bihać koji u trenutku sjednice radi na popravci cijevi za naselje Brekovicica i Plato jer su ta naselja već tri dana bez vode, međutim vijećnik smatra da je tužno što ovo preduzeće nema dovoljno sredstava već su morali iznajmiti bagere kako bi ustvari riješili kvar koji se napravio na cijevima koje su metar ispod nivoa Une. Također navodi da radnici JPVodovod rade u najtežim uslovima, a gradski vijećnici ne žele da usvoje plan i program ovog preduzeća. Traži od Gradonačelnika i Gradskog vijeća da se hitno napravi tematska sjednica po pitanju poplava i JP „Vodovod“ d.o.o Bihać, te da se ovom preduzeću pomogne kako bi isto imalo makar osnovne stvari da se bave aktivnostima, za koje su ustvari zaduženi. Predlaže da se napravi pauza kako bi vijećnici otišli u naselje Kostela, da se samo uvjere u kakvim katastrofalnim uslovima ti radnici moraju da rade, kako bi našim građanima omogućili vodu. Između ostalog navodi da se pod hitno treba organizovati sastanak sa Federalnom direkcijom cesta, jer smatra da su i oni veliki krivac zbog izlivanja vode. Federalna direkcija cesta i JP Željeznice FBiH, po vijećnikovom mišljenju mogu jako puno da urade kako bi se u budućnosti izlivanje vode u toku kiša smanjilo. Ponavlja da traži tematski sjednicu kako bi se sve ove stvari koje je naveo dogovorile.

Vijećnik Adis Dizdarić

Koristi priliku da sve pozdravi i da čestita kolegi Igoru na osvojenom mandatu. Koristi svoje vrijeme aktuelnog sata da se zahvali svima koji su dali svoj doprinos u vidu pomoći unesrećenim građanima. Posebna zahvala ide na adresu organizacije S.O.S. Bihać kao i ronilačkom klubu „Una“. Također veliku zahvalu upućuje JP „Komrad“ Bihać d.o.o kao i

Veterinarskoj stanici Bihać na brznoj reakciji kada je u pitanju uklanjanje agresivnih pasa lotalica u naselju odnosno na području Prekounja. Koristi priliku da opet ukaže na već odavno aktuelni problem sa psima lotalicama, pa apelira Gradskim službama da se više i intenzivnije uključe u rješavanje ovog problema iako vijećnik zna da je to veliki problem.

Vijećnik Edin Goretić

Koristi priliku da sve pozdravi, i da se zahvali ljudima koji su došli posjetiti Grad Bihać u tim teškim momentima poput Premijera Federacije Nermina Nikšića, kao i predsjednika države Denisa Bećirevića. Također zahvali upućuje i Vojinu Mijatoviću koji je također došao posjetiti naš Grad, kao i kantonalnoj zastupnici Fatki Kulenović koja je jedina izašla u poplavljena područja da posjeti građane pogođene poplavama.

Vijećnička pitanja I inicijative:

Vijećnik Asmir Budimlić

Zahtjev za sazivanje Vanredne sjednice Gradskog vijeća

Prije svega, želim Vas podsjetiti da je Štab Civilne zaštite Grada Bihać u zadnjih šest mjeseci nažalost u dva navrata morao proglasiti stanje prirodne nesreće. Naime, usljed obilnih padavina koje su prouzrokovale rast vodostaja svih Rijeka u Gradu Bihaću došlo je do izlivanja vode iz riječnih korita, prodiranja vode u stambene, poslovne i pomoćne objekte, kao i aktivaciju klizišta. Osim toga u našem gradu su prekinute i brojne putne komunikacije, a veliki broj građana privremeno je morao biti evakuisan iz svojih domova. Na svu sreću nije bilo stradalih ili povrijeđenih građana.

I sami smo svjesni da ovo nije zadnja poplava koja će nas zadesiti pa radi toga smatramo da se sa ovim pitanjem Gradsko vijeće mora ozbiljnije pozabaviti.

Svjedoci smo da brojnim građanima radi administrativnih prepreka nisu isplaćene štete koje su nastale u predzadnjim poplavama pa smatramo da trebamo naći adekvatne načine da svaki građanin našeg grada čim prije osjeti pomoć i svojevrsnu nadoknadu štete.

Ja se ovom prilikom zahvaljujem svim nivoima vlasti koji su neki način reagirali i poslali određena finansijska sredstva našem gradu, ali smatramo da nama ne trebaju jednokratne pomoći nego istinski plan odbrane od poplava koji će većinskim dijelom biti finansiran od strane viših nivoa vlasti, jer valjda ne treba napominjati da smo i mi država Bosna i Hercegovina i da očekujemo ravnopravan i adekvatan odnos prema Gradu Bihaću i

njegovim građanima.

S tim u vezi, u skladu sa članom 81. stav 2., te članom 83. stav 4. i 5. predlažemo da se u naredna 72 sata održi vanredna sjednica Gradskog vijeća Grada Bihaća na kojoj bi se raspravljalo o trenutnoj situaciji i mjerama koje moramo preduzeti u cilju saniranja nastalih šteta ali i poduzimanju radnji koje će ublažiti eventualni nadolazak ove vrste nesreće.

Do same sjednice, mi u klubu vijećnika SDA ćemo pripremiti set zaključaka koje ćemo predložiti ovom predstavničkom tijelu na usvajanje uz uvažavanje svih sugestija i prijedloga ostalih kolegica i kolega kako bi se formirali zajednički stavovi. Napominjem nas sviju da je ovo naš zajednički problem i da zajednički trebamo zbiti redove i tražiti najbolja rješenja.

Na kraju, ja se u ime kluba vijećnika SDA želim zahvaliti Štabu Civilne zaštite Grada Bihać, Crvenom križu Grada Bihaća, Islamskoj vjerskoj zajednici, nevladinom sektoru, raznim udruženjima i pojedincima koji su danonoćno radili i borili se sa nedaćom koja nas je zadesila. Očekujemo i tražimo da se po ovoj inicijativi hitno reagira.

Vijećnik Sulejman Kulenović

Vijećničko pitanje za gospodina direktora J.U. „Zavoda za prostorno uređenje Bihać" Kada će se riješiti problem plavljenja objekata u MZ Luke, posebno ulica Kunovska i Mimara Hajredina iz razloga izlivanja oborinskih i fekalnih voda iz sistema mješovite javne kanalizacije. Naši sugrađani MZ Luke već dugi niz godina imaju veliki problem, naime nakon svake jače kiše u ovoj MZ posebno u ulicama Kunovska i Mimara Hajredina dolazi do izlivanja oborinskih i fekalnih voda iz mješovitog sistema javne kanalizacione mreže. Razlog za to leži u činjenici da je postojeća kanalizaciona mreža neadekvatna za današnje potrebe MZ Luke, jer je u posljednje vrijeme izgrađeno nekoliko zgrada, tj. objekata za kolektivno stanovanje a svi su objekti spojeni na staru kanalizacionu mrežu. Također ovu situaciju dodatno usložnjava i činjenica da je grad Bihać izgradio kanalizacionu mrežu u naselju Križ koja je također spojena u kanalizacionu mrežu u M.Z Luke, što je dodatno opteretilo ionako nedovoljan kapacitet kanalizacione mreže M.Z Luke. Ovakva situacija je za stanovnike M.Z Luke neodrživa jer su u nekoliko proteklih godina pretrpjeli veliku materijalnu štetu na svojim kućama. Stanovnici M.Z Luke rješenje ovog problema vide u izgradnji nove kanalizacione mreže. Građani M.Z Luke su se u 12. mjesecu 2022. godine obratili Službi za inspeksijske poslove, odsijeka za komunalnu inspekciju, koja je 13.12.2022. godine izvršila inspeksijski nadzor i ustanovila ovaj problem tj da isti predstavlja opasnost po

život i zdravlje stanovništva zbog izbijanja na kanalizacionim šahtovima, fekalnih, sanitarnih i atmosferskih voda. Upućen je zahtjev i J.P Vodovod Bihać" da se hitno poduzmu sve potrebne mjere u cilju rješavanja ovoga problema, ali do sada problem nije riješen.

Vijećnik Amir Kozlica

a) Pitanje za direktora Zavoda za prostorno uređenje gđin. Ademir Toromanović

Kad počinje redovno održavanje i nasipanje puteva jer građanje šalju upite?

b) Pitanje za Gradonačelnika gđin. Elvedin Sedić

Kad možemo očekivati da se počne isplaćivati šteta prouzrokovana poplavama?

Vijećnica Šeherzada Delić

Na osnovu člana 39. stav (1) alineja e) Statuta Grada Bihaća, te članova 29. stav (2)., člana 93. stav (1). i člana 95. stav (1)., (2). i (4). Poslovnika o radu Gradskog vijeća, postavljam vijećničko pitanje gore navedenim tijelima (Grad Bihać, Gradsko vijeće, JU Zavoda za prostorno uređenje Bihać)

Obrazloženje

Neki dan sam prolazila ulicom Gazi Husrev-begovom, to je usko jezgro grada, ogledalo grada. Turisti odnose sa sobom sjećanja uglavnom iz središta gradova koje posjete. Kakva će sjećanja odnijeti na naš cenar? Zar se u 21.st., mogu prihvatiti ovako izvedeni radovi? Zar se ovako, doslovno krpe, novi tek postavljeni šahtovi? (pokažem sliku)

A između kockica nije posut kvarcni pjesak, što je najskuplja stavka ovih radova.

pitam direktora Zavoda za prostorno uređenje, da li bi on u svom dvorištu, kod svoje kuće ovo dozvolio? A ovo je samo jedan, od milion primjera nakaradno, nestručno, i neznački urađenih poslova u našem gradu: po kolovozima, trotoarima, stepeništima, šahtovima, prostoru za kontejnere za smeće, kanalima, česnama, pješačkim zonama itd.

Voljela bih, kada bismo svi zajedno izišli iz ove vijećnice dvjesto metara dalje da vidite o čemu govorim. Unaprijed se zahvaljujem na odgovorima.

b) Na osnovu člana 39. stav (1) alineja e) Statuta Grada Bihaća, te članova 29. stav (2)., člana 93. stav (1). i člana 95. stav (1)., (2). i (4). Poslovnika o radu Gradskog vijeća, postavljam vijećničko pitanje gore navedenim tijelima: (Grad Bihać, Gradskoj Službi za urbanističko planiranje, građenje, imovinsko-pravne i geodetske poslove, Službi za finansije, privredu i poljoprivredu, Službi za strateško planiranje, upravljanje projektima, komunalne djelatnosti,

vode i zaštitu okoliša, Službi za inspeksijske poslove)

Koliko je do sada bespravno izgrađenih objekata u području Lohova i Račića;

Koliko je do sada legalizirano bespravno izgrađenih objekata u zoni Lohova i Račića;

Da li postoji pregled bespravno izgrađenih objekata sa tačno navedenim podacima o vlasnicima i namjenom građevina;

Kolika je ukupna površina vodnog dobra zahvaćena bespravnom gradnjom;

Kolika je ukupna površina poljoprivrednog zemljišta zahvaćena bespravnom gradnjom?

Koje mjere su do sada preduzele nadležne službe grada Bihaća po pitanju bespravne gradnje u navedenoj zoni?

Obraloženje :

Svjedoci smo da u gradu Bihaću bespravna gradnja uzima sve više maha i prijeti da naruši kompletan prostor s čime se poništava temeljna racionalnost korištenja prostora.

Bespravna gradnja u dugoročnom smislu trajno mijenja i uništava prostor i direktno smanjuje kako sadašnje, tako i buduće razvojne mogućnosti i zapravo predstavlja čin agresije u prostoru.

Masovna bespravna gradnja narušava suštinu života u organiziranom društvu i svaki smisao planiranja prostora, a bespravni graditelji ugrožavaju javni interes i funkcionalno korištenje prirodnih površina. U dosadašnjoj praksi upravljanja vodama, na vodnom području rijeke Une, jedan od značajnijih problema u sektoru voda bila je gradnja stambenih, objekata za odmor i rekreaciju, kao i drugih građevina, neposredno na obalama rijeke Une. Problem je izražen na način, da su na obalama rijeke Une "legalno" i nelegalno izgrađeni objekti koji predstavljaju prepreku za nesmetan pristup vodotoku, ugrožavaju druge objekte kod pojave velikih voda, onemogućuju izgradnju i održavanje javnih objekata od interesa kao što su zaštitni vodni objekti za odbranu od poplava, čine hidromorfološki pritisak na vodotok, te uzrokuju mnoge druge problem s kojima se suočavaju, kako institucije koje upravljaju vodotocima, tako i svi ostali korisnici ovog prirodnog resursa.

Ova pojava je naročito izražena na području Lohova i Račića, u dodiru sa Nacionalnim parkom "Una" i stiče se dojam da Gradska uprava to toleriše, radi čega i postavljam vijećničko pitanje i zahtijevam precizan odgovor sa svim traženim podacima, u pisanoj formi, svaka Služba prema svojoj nadležnosti.

Vijećnik Adis Dizdarić

Shodno odredbama člana 39. stav (1). tačka e.) Statuta Grada Bihaća („Službeni Glasnik Grada Bihaća broj 13/15) i člana 93. stav (1). Poslovnika Gradskog vijeća Grada Bihaća

postavljam VIJEĆNIČKO PITANJE

Pitanje:

U kojoj je fazi rješavanje problema ruševnog objekta na ulazu pijace u Hadžiabdića mahali na kojem je postavljena sigurnosna traka naše inspekcije?

Taj objekat je prijetnja po sigurnost svih prolaznika i učesnika u saobraćaju, te je potrebno u što skorijem periodu izdati nalog za rušenje dok nije došlo do neželjenih posljedica.

Vijećnik Hasan Fatkić

a) Na osnovu člana 93 stav (1) i (2), Poslovnika Gradskog vijeća tražim od Gradonačelnika Grada Bihaća odgovor U jesen prošle godine kontaktirali su me iz Službe za strateško planiranje, upravljače projektima, komunalne djelatnosti, vode i zaštitu okoliša sa upitom da li sam zainteresiran da kao gradski vijećnik i član Zelenog pokreta sudjelujem u projektu međuopćinske saradnje sa jednim švedskim gradom, odnosno da budem član Upravne grupe projekta. Projekat se odnosio na unapređenja u upravljanju otpadom i tad je bio u fazi pisanja aplikacije. Sa velikim zadovoljstvom sam prihvatio sudjelovanje u projektu, te sam početkom ove godine obaviješten da je švedska organizacija kod koje se apliciralo sa projektom isti odobrila. Između ostalog, ovaj projekt se sastoji od međusobnih posjeta predstavnika Bihaća i Norčepinga u svrhu učenja i razmjene iskustava. Međutim, kako se bližio put u Švedsku saznao sam da sam isključen iz projekta, odnosno iz Upravne grupe. Na moje traženje da me primi Gradonačelnik Sedić, nakon 25 dana čekanja pored ostalih pitanja pitao sam razlog mog isključivanja iz projekta,- kaze Gradonačelnik je odgovorio da on nema veze s tim, da nema razloga za to.

Tri dana nakon mog razgovora sa Gradonačelnikom pozvala me službenica iz Gradske uprave i tražila moje podatke kako bi organizirala naknadnu rezervaciju moje avionske karte za Švedsku. Ja nisam prihvatio da se naknadno stavljam na spisak da se neko igra sa mojim integritetom i da na takav način ružno predstavlja Grad Bihać. Znam da zbog svog karaktera ne uživam podršku Gradonačelnika niti mi šta treba od istog ,jer ne želim biti njegov KLIMOGLAVAC i podržavati nešto što po mom mišljenju nije ispravno . Međutim ako nije odlučivao Gradonačelnik iako je domaćin ove kuće, drugi koje odlučivao je velika Šefica pomoćnica Gradonačelnika Vildana Zulić.

Vildana Zulić nije zadovoljna moji radom u Gradskom vijeću jer ne podržavam rad JP „Vodovod“ d.o.o Bihać čiji je ona konstantni izvjestilac po svim pitanjima i ima interes da sve njene želje prođu jer: konsalting usluge u JP „Vodovod“ radi njen muž koji svoje usluge i dobro naplati, takođe zet joj je finansijski direktor. Sukob interesa do neba. Međutim za ove

POŠTENE POMAKOVCE to nema veze. Tražim odgovor od Gradonačelnika da mi kaže javno razlog mog isključivanja sa liste Gradskih vijećnika za odlazak u Švedsku po ovom projektu.

b) Na osnovu člana 93 stav (1) i (2), Poslovnika Gradskog vijeća tražim od Gradonačelnika Grada Bihaća odgovor

Od samog pomaknuća POMAK sa ulice u Gradsku upravu Grada Bihaća kružila je priča od strane Gradonačelnika Fazlića i POMAKOVACA kako je 31.12.2016 Grad bio dužan oko 40 mil maraka. Na tim netačnim tvrdnjama dobijeni su jedni, drugi, treći izbori.

Već dugo tražim stanje financija i napokon 15.03.2023.godine sam dobio odgovor od strane pomoćnice Gradonačelnika za finansije u kojem stoji da je stanje obaveza (DUG) grada Bihaća na dan 31.12.2016.godine je bio 11.196.996,88 KM, stanje potraživanja 3.008.087,66 KM znači razlika između dugovne i potražne strane je oko 8.000.000 KM.

Pitam Gradonačelnika Sedića da mi kaže čime s Ovih 8.000.000 KM vraćani su nikako aktivnosti Gradske uprave na čelu sa POMAKOM nego prodajom Gradske imovine tako da je Grad Bihać u periodu od 01.01.2017 do 31.10.2022 .godine prodao i naplatio Gradske imovine u iznosu od 8.778.678,00 KM što znači kad vrati zatečeni dug koji je našao 31.12.2016.godine ostane još oko 800.000 KM.

Međutim Stanje obaveza (DUG) Grada Bihaća na dan 31.10.2023.godine 6.250.563,68 KM a potraživanja Grada Bihaća su 3.740.591,80 KM tako da je negativna razlika (DUG) ponovo oko 2.509.971,00 KM pa se pitam šta ćemo sad prodati da vratimo dugove. Iz ovog proizilazi da POMAK u protekli 6 godina svoje vladavine u Gradu Bihaću svojim aktivnostima nije vratio ni jednu KM. Takođe iz ovog izvještaja je primjetno da su nenaplaćena potraživanja Grada Bihaća za 700.000 KM više 31.10.2023 u odnosu na 31.10.2023 31.12.2016.godine što se da zaključiti da se puno slabije vršila naplata potraživanja za vrijeme mandanta Šuhreta Fazlića nego ranijih godina. Pitam Gradonačelnika Sedića da mi kaže čime su se vodili kad su proteklih 6 godina kao i u svojoj kampanji pričali građanima Grada Bihaća da vraćaju dug od 40 milona kad isti dug nije ni postojao

Imamo li i malo POŠTENJA kako kaže vaš izborni slogan.

Vijećnik Edin Felić

Od Službe Gradskog vijeća tražim odgovor na slijedeće vijećničko pitanje:

- tačan broj vijećničkih pitanja i vijećničkih inicijativa za period 01.01- 15.05.2023. godine i tačan broj konkretnih odgovora na vijećnička pitanja i vijećničke inicijative

Molim da mi se podijele vijećnička pitanja i vijećničke odgovore u 3 skupine i to :

- pitanja i inicijative upućene prema Gradonačelniku
- pitanja i inicijative upućene prema Službama Gradske uprave
- pitanja i inicijative upućene prema Javnim ustanovama
- pitanja i inicijative upućene prema Javnim preduzećima

Tražim da mi se odgovor na ovo moje vijećničko pitanje dostavi na prvoj narednoj sjednici.

Vijećnik Alen Zulić

S obzirom na višegodišnju problematiku vezanu za slučaj pasa lotalica, tražim te upućujem inicijativu da se u što hitnijem roku oformi Komisija koja će se krajnje ozbiljno i odgovorno posvetiti rješavanju ovog gorućeg problema – a koji je već odavno van kontrole

U komisiju predlažem određeni broj gradskih vijećnika, predstavnike stručnih odnosno resornih službi, menadžmenta i uprave JU Veterinarske stanice i JKP Komrad, te Službe inspekcije.

Obrazloženje : kao građanin ali prvenstveno kao vijećnik, gotovo svakodnevno dobijam pritužbe, molbe a sve češće i panične pozive u pomoć uslijed napada pasa lotalica koji zapravo naše građane sada već redovno napadaju čak i u formacijama čopora.

Inicijative:

Vijećnik Šefik Kličić

a) Akciji čišćenja ulica u užem dijelu grada Bihaća u aprilu mjesecu od strane JKP Komorad Doo Bihać, predhodila je akcija čišćenja u MZ Mali Lug 18.i 19. 3. ove godine mještani su svojim učešćem realizirali dogovor Dž.odbora, savjeta MZ, udruženja OPTIMIZAM I SU Mali Lug čišćenja MZ Mali Lug. Akcija je bila zahtjevna i trajala je cijeli mj. Ramazan. Akcija je imala za cilj da sve površine oslobodi od korova, žbunja, niskog rastinja i šiblja te ih vrata u zeleni pojas. (samo da navedem primjera radi, utrošeno je 1501 goriva za kosilice,

trimere i motorne pile). U 80% smo dijelu očistili MZ Mali lug. Da bi se nastavila održavati čistoća potrebno je slijedeće: -da se angažuje 1 komunalni radnik od strane nadležne službe u periodu od 1.4. - 1.11. tekuće godine, ili -sezonski radnik od nadležne službe u periodu od 1.4.- 1.11. tekuće godine. Na taj način bi se proširila već postojeća aktivnost u MZ Gornje Prekounje, gdje komunalni radnik tokom cijele godine čisti i kupi smeće i tako održava čistoću okoliša. Sad se primijećuje zadnjih par dana istu aktivnost u MZ Donje Prekounje. Smatramo da je to opravdano te je potrebno to primijeniti i na sve druge MZ, a posebno na one MZ-e koje su očišćene. Trenutno je takva MZ Mali Lug

OČEKUJEMO VAS !!!

b) Da bi došli do odgovarajuće sigurnosti svih učesnika u saobraćaju u MZ Mali lug potrebno je nastaviti sa realizacijom upućenih inicijativa. Postavljenjem upozoravajućeg znaka STOP i ležećeg policajca na potrebno mjesto još nedostaje - saobraćajni znak sa ograničenjem brzine kroz naselje, te ogledalo kod druge krivine u lijevo zbog nepreglednosti dvije vezane ceste. U produžetku kod treće krivine u desno, zbog svoje oštine i šireg kanala za oborinske vode potrebna je zaštitna ograda - bankina. Na taj način mi ćemo umanjiti sve dosadašnje prijetnje koje su bile prisutne.

UNAPRIJED HVALA !!!

c) U Donjem Prekounju u ulici Kasima Čehajića i Čehajić mahale (preko puta Amfore) nalaze se dva objekta – porodične kuće koje već duže vrijeme ne služe svojoj svrsi. Isti su neestetski, poluruševni, mesta za vršenje nužde, potencijalna žarišta za bilo koju vrstu zarazne bolesti i mjesta koja šire neugodne mirise i sve to postaje opasnije ukoliko dočekaju nadolazeće ljeto.

Zbog toga predlažem nadležnoj Službi da što prije uklone te objekte – porodične kuće radi sprečavanja svega navedenog. Unaprijed hvala od komšija koji su tražili da se ovo iznese i predoči Gradskom vijeću

Vijećnica Šehrzada Delić

Inicijativa da Grad Bihać pokrene proceduru dobijanja oficijalne "gov.ba" domene kao što to imaju druge zvanične institucije i gradovi/općine u BiH Grad Bihać

Služba za stručne poslove gradskog vijeća

Obrazloženje:

Obrazloženje: "gov.ba" domena za razliku od "org" domene daje sigurnost posjetiocima da je pitanju zvanična stranica koju mogu imati samo i ISKLJUČIVO vladine institucije te podiže

повjerenje posjetioca i investitora u ozbiljnost informacija objavljenih na njoj

Vijećnik Adis Dizdarić

a) Službi za strateško planiranje, upravljanje projektima, komunalne djelatnosti, vode i zaštitu okoliša i Komisiji za sigurnost i regulaciju saobraćaja Grada Bihaća za postavljanje ležećih policajaca u blizini Osnovnih škola Bakšaiš i Gornje-Prekounje Ripač

Obrazloženje:

Inicijativu prilažem na zahtjev građana ovih mjesnih zajednica, iz razloga što se u blizini ovih škola primjećeno odvijanje saobraćaja bez poštivanja znakova za ograničenje brzine, što ugrožava sigurnost školaraca. Napominjem da je potrebno postaviti standardne ležeće policajce, jer u ovom slučaju vibro-trake ne bi dale željeni efekat.

b) Shodno odredbama člana 39. stav 1. tačka e. Statuta Grada Bihaća („Službeni Glasnik Grada Bihaća broj 13/15) i člana 93. stav 1. Poslovnika Gradskog vijeća Grada Bihaća upućujem INICIJATIVU

Službi za urbanističko planiranje, građenje, imovinsko-pravne i geodetske poslove da se na građevinskim parcelama u vlasništvu Grada Bihaća zabrani gradnja ili da im se izvrši prenamjena u poljoprivredno zemljište

Obrazloženje:

11 Povezanih parcela od broja k.č. 6256/101 pa sve do parcele broj k.č. 6256/111 u MZ Ribić mjesto Novo Naselje nalaze se iznad izgrađenih porodičnih kuća, koje su u proteklim vremenskim nepogodama imale problema sa aktivnim klizištem, stoga je potrebno zabraniti ikakvu daljnju gradnju zbog sigurnosti mještana. Novonastala situacija na terenu je dokumentovana i prijavljena Službi za civilne poslove Grada Bihaća.

Vijećnik Adnan Mekić

- Inicijativa za promjenu/ davanje naziva ulice

Ovom inicijativom Vas molimo da na nekoj od narednih sjednica Gradskog vijeća donesete odluku da se dodjeli naziv ulice(, trenutno bez naziva), a koja se prostire od zapadnog kraja ulice Ivana Franje Jukića pa sve do bivšeg aerodroma Željave. Trenutno taj put/ulica nema naziva. Naš prijedlog je da se ta ulica nazove: „Ulica bihaćkih zrakoplovaca" ili "Put bihaćkih zrakoplovaca", "Aerodromska",

Obrazloženje:

Naime, mislimo da su bihaćki zrakoplovci dali veliki doprinos u afirmaciji grada Bihaća, kako u BiH tako i šire. Bihaćko zrakoplovstvo ima dugu tradiciju, preko skoro 80 godina, i u tih 80

godina su predstavljali grad Bihać na mnogim takmičenjima u BiH i šire, učestvovali na svjetskim prvenstvima, učestvovali i dali nesebičan doprinos u odbrani Bosne i Hercegovine tokom posljednje agresije. Činjenica da su Grad Bihać i AK Željava, uredbom Vlade Federacije, dobili Aerodrom Željavu na korištenje, stvara pretpostavke da će se u narednom periodu taj put/ulica mnogo više koristiti i da će se planom Turističke zajednice i AK Željava na istom području praviti Muzej na otvorenom, trim staze, registrovati letjelište itd., bilo bi dobro da ti svi objekti imaju adresu po bihaćkim zrakoplovcima.

Neki od bihaćkih zrakoplovaca:

Edvin Iftić-(umrli)pilot,dao nesebičan doprinos u odbrambenom ratu- prvi ratni let Armije BiH- 18.05.1992. godine

Ale Alagić- aeromodelar od 1953.godine, Učesnik reprezentacije BiH na svjetskom prvenstvu aeromodelara u SAD-u.

Frančeski Janda-(umrli) nastavnik padobranstva, komandir čete Odreda za specijalna dejstva 5.korpusa,dao nesebičan doprinosu odbrani BiH

Zvonko Birjukov - pilot i aeromodelar- prvak Jugoslavije u aeromodelarstvu

Haris Hadžihajdarević- aeromodelar, dobitnik nagrade sportista godine Grada Bihaća, učesnik na svjetskom prvenstvu u aeromodelarstvu

Meho Merdanić, pilot helikoptera, dao nesebičan doprinos u domovinskom ratu kao pilot helikoptera

Suad Pečenković,pilot i kapetan Boeing 737, dao nesebičan doprinos u odbrani BiH

Tedi Baier, pilot, kontrolor letenja i nastavnik jedriličarstva, obučio mnoge generacije mladih jedriličara.

Amir Raković, (umrli) zmajar i nastavnik zmajarstva, prvi zmajar u BiH

Dževad Mešić, (umrli), istaknuti zrakoplovac, prvi pobjednik takmičenja u preciznom slijetanju

Blanik Kup BiH, osvajao mnoge nagrade

Zrakoplovci iz Bihaća,poginuli kao pripadnici ARBIH:

-

Muhamed Hambašić

Sidik Smlatić

Kantarević Sanel

Rekanović Safet

Midžić Elvedin

Halilić Safet

Huskić Hajro

Hamulka Aneto

Žerić Sadnel

U nadi da ćete predmet pozitivno riješiti, Srdačno Vas pozdravljamo !!

Vijećnik Hasan Babić

a)Predmet: INICIJATIVA, dostavlja se;

Na osnovu člana 93. stav 1, 2 i 4, danas prema imenovanima (JP CESTE F BIH, JP ŽELJEZNICE F BIH EPPES, VLADA USK, GRAD BIHAĆ upućujem inicijativu za održavanje radnog sastanka u cilju rješavanja slijedećih pitanja:

1. Rekonstrukcija dijela magistralne ceste M14 u naselju Kostela od Kokića jaruge do Brekovačkog mosta gdje svaki put uslijed plavljenja dolazi do poplava stambenih objekata, velikih šteta na istima, obustave saobraćaja,prestanaka napajanja pitkom vodom naselja Kostela, Brekovica,Spahići, Jezero Gornji Srbljani
2. Izdavanje neophodnih dozvola za izgradnju brekovačkog mosta I rekonstrukciju raskrsnice (izgradnje treće trake) na tom dijelu puta na koji se uključuje brekovački most, te dijela lokalnog puta iz naselja Brekovica koji se uključuje na most
3. Način finansiranja izgradnje brekovačkog mosta u skladu sa Sporazumom potpisanim u julu 2015.godine.
4. Izgradnja otvorenog kanala duž pruge od Kokića jaruge do brekovačkog mosta,kako bi taj kanal kupio oborinske vode sa platoa Spahića, koje bi se zatim odvodile u rijeku Unu ispod mosta, I na taj način smanjio eventualni utjecaj podizanja nivoa Une I plavljenja stambenih objekata I pumpne stanice za vodu.

b) Upućujem inicijativu Vladi USK – ministarstvu za boračka pitanja, Gradu Bihaću – gradonačelniku, Službi za stručne poslove Gradskog vijeća, i JP Komrad d.o.o Bihać Kojom tražim da se u što kraćem vremenskom periodu iznađe rješenje kojom će se omogućiti bar djelimična rekonstrukcija na mezarju Humci, u dijelu da se poliraju spomenploče i osvježe novom bojom ispisana imena poginulih šehida – boraca, da se izvrše zamjene oštećenih dijelova pristupnih staza i kamenih ploča te čišćenje pristupnih staza od izrasle mahovine i ostaloh nečistoća

Predsjedavajući zatvara set vijećničkih pitanja i inicijativa.

Pomoćnik gradonačelnika – Edin Kulenović

U svom izlaganju odgovorio na pitanja

Izvršni direktor JP „Vododvod“ Bihać – Amir Malkoč

U svom izlaganju odgovorio na pitanja

Direktor JU „Zavod za prostorno uređenje“ – Ademir Toromanović

U svom izlaganju odgovorio na pitanja

Pomoćnica gradonačelnika – Jasmina Ćoralić

U svom izlaganju odgovorila na pitanja

- Vijećnik Hasan Fatkić navodi da nije zadovoljan odgovorom, te traži dodatna pojašnjenja, od pomoćnice gradonačelnika Jasmine Ćoralić.

- Vijećnica Šeherzada Delić također navodi da želi dodatna pojašnjenja od pomoćnika gradonačelnice Jasmine Ćoralić. i direktora JU „Zavoda za prostorno uređenje“ Ademira Toromanović.

Pomoćnica gradonačelnika – Jasmina Ćoralić

U svom izlaganju odgovorila na pitanja

Savjetnik gradonačelnika – Edin Moranjkić

U svom izlaganju odgovorio na pitanja

Pomoćnik gradonačelnika – Suvad Tutić

U svom izlaganju odgovorio na pitanja

- Vijećnica Šeherzada Delić navodi da želi dodatna pojašnjenja od pomoćnika gradonačelnika Suvada Tutića.

- Vijećnik Hasan Fatkić traži dodatna pojašnjenja, od pomoćnika gradonačelnika Suvada Tutića.

Ispred Službe za urbanističke poslove, građenje, imovinsko pravne i geodetske poslove – Sijana Hošć

U svom izlaganju odgovorila na pitanja

Pomoćnica gradonačelnika – Vildana Zulić

U svom izlaganju odgovorila na pitanja

Prije samog dnevnog reda Predsjedavajući Zulfikar Handukić koristi priliku da se javno zahvali svim medijima koji su bili na terenima i izvještavali predano, istinito i hrabro.

TOK RASPRAVE :

Ad.1.

a) Prijedlog Odluke o utvrđivanju javnog interesa za nepotpunu eksproprijaciju nekretnina u svrhu izgradnje elektroenergetskog objekta priključnog podzemnog 10(20)/0,4 kV kablovskog dalekovoda za TS 10(20)/0,4 kV „Podstrana 2“ i TS 10(20) /0,4 kV „Podstrana 2“, Grad Bihać, u korist JP „Elektroprivreda BiH“ d.d. Sarajevo, Podružnica „Elektrodistribucija“ Bihać

b) Prijedlog Odluke o utvrđivanju javnog interesa za potpunu eksproprijaciju nekretnina u svrhu sanacije odrona i rekonstrukcije dijelova regionalne ceste R 403a, dionica Kamenica-Gata II, stac. km od 7+700 do 7+806 km, u korist JU „Direkcija regionalnih cesta USK“

c) Prijedlog Odluke o utvrđivanju javnog interesa za nepotpunu eksproprijaciju nekretnina – u svrhu izgradnje priključnog KB 10(20) kV voda za TS 10(20)/0,4 kV „Zaobilaznica 5“ sa dva paralelna podzemna voda (Dionica KB 10(20) kV Dionica DV „Pokoj“ – TS „Zaobilaznica 5“) i (Dionica KB 10(20) kV TS „Zaobilaznica 5“ – TS „Čavkunović“) Grad Bihać, u korist JP „Elektroprivreda BiH“ d.d. Sarajevo, Podružnica „Elektrodistribucija“ Bihać

Izvjestilac : Mirela Delić – ispred Službe za za urbanističko planiranje ,građenje,imovinsko-pravne i geodetske poslove

Zulfikar Handukić – predsjednik Statutarne Komisije

Pravni osnov za donošenje predloženih Odluka, sadržan je u članu 14. stav (4) Zakona o eksproprijaciji („Službene novine Federacije BiH“, broj: 70/07, 36/10, 25/12 i 34/16), kojim

je utvrđena nadležnost gradskog vijeća za donošenje odluke o utvrđivanju javnog interesa za izgradnju objekata ili izvođenje radova na području Grada na čijem se području namjerava graditi objekat i izvoditi radovi u skladu sa planskim dokumentima prostornog uređenja, te u članu 35. tačka c) Statuta Grada Bihaća („Službeni glasnik Grada Bihaća“, broj: 13/15, 13/18 i 12/22).

Komisija traži od predlagača da uz prijedlog Odluke pod c) dostavi situaciju terena.

Komisija prosljeđuje predložene Odluke Gradskom vijeću, na razmatranje i zauzimanje konačnog stava.

Lejla Bakrač – zamjenica predsjednika Komisije za finansije i budžet

a) Prijedlog Odluke o utvrđivanju javnog interesa za nepotpunu eksproprijaciju

nekretnina ustanovljenjem služnosti u svrhu izgradnje elektroenergetskog objekta priključnog podzemnog 10(20)/0,4kV kablovskog dalekovoda za TS 10(20)/0,4kV „Podstrana 2“ i TS 10(20)/0,4kV „Podstrana 2“, grad Bihać u korist JP Elektroprivreda BiH d.d. Sarajevo, Podružnica „Elektrodistribucija“ Bihać.

b) Prijedlog Odluke o utvrđivanju javnog interesa za nepotpunu eksproprijaciju

nekretnina u svrhu izgradnje priključnog KB 10(20) kV voda za TS 10(20)/0,4 kV „Zaobilaznica 5“ sa dva paralelna podzemna voda (Dionica KB 10(20) kV Dionica DV „Pokoj“ –TS „Zaobilaznica 5“) i (Dionica KB 10(20) kV TS „Zaobilaznica 5“ – TS „Čavkunović“) Grad Bihać u korist JP Elektroprivreda BiH d.d. Sarajevo, Podružnica „Elektrodistribucija“ Bihać.

Obzirom da su za realizaciju predloženih Odluka obezbijeđena finansijska sredstva od strane korisnika eksproprijacije JP „Elektroprivreda BiH“ d.d. Sarajevo, Podružnica „Elektrodistribucija“ Bihać, Komisija iste prihvata i prosljeđuje Gradskom vijeću, radi obavljanja rasprave i zauzimanja konačnog stava.

c) Prijedlog Odluke o utvrđivanju javnog interesa za potpunu eksproprijaciju

nekretnina u svrhu sanacije odrona i rekonstrukcije dijelova regionalne ceste R 403a, dionica Kamenica-Gata II, stac. km od 7+700 do 7+806 km u korist JU Direkcija regionalnih cesta USK.

Obzirom da su za realizaciju predložene Odluke obezbijedena finansijska sredstva od strane korisnika eksproprijacije JU Direkcija regionalnih cesta USK, Komisija istu prihvata i prosljeđuje Gradskom vijeću, radi obavljanja rasprave i zauzimanja konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

a) Prijedlog Odluke o utvrđivanju javnog interesa za nepotpunu eksproprijaciju nekretnina u svrhu izgradnje elektroenergetskog objekta priključnog podzemnog 10(20)/0,4 kV kablovskog dalekovoda za TS 10(20)/0,4 kV „Podstrana 2“ i TS 10(20) /0,4 kV „Podstrana 2“, Grad Bihać, u korist JP „Elektroprivreda BiH“ d.d. Sarajevo, Podružnica „Elektrodistribucija“ Bihać

b) Prijedlog Odluke o utvrđivanju javnog interesa za potpunu eksproprijaciju nekretnina u svrhu sanacije odrona i rekonstrukcije dijelova regionalne ceste R 403a, dionica Kamenica-Gata II, stac. km od 7+700 do 7+806 km, u korist JU „Direkcija regionalnih cesta USK“

c) Prijedlog Odluke o utvrđivanju javnog interesa za nepotpunu eksproprijaciju nekretnina – u svrhu izgradnje priključnog KB 10(20) kV voda za TS 10(20)/0,4 kV „Zaobilaznica 5“ sa dva paralelna podzemna voda (Dionica KB 10(20) kV Dionica DV „Pokoj“ – TS „Zaobilaznica 5“) i (Dionica KB 10(20) kV TS „Zaobilaznica 5“ – TS „Čavkunović“) Grad Bihać, u korist JP „Elektroprivreda BiH“ d.d. Sarajevo, Podružnica „Elektrodistribucija“ Bihać usvojeno sa 25 glasova „ZA“ - jednoglasno

Ad.2.

Prijedlog Odluke o davanju saglasnosti na samoinicijativnu ponudu za dodjelu koncesije privrednom društvu „Green Water“ d.o.o. Kulen Vakuf, Bihać za korištenje vode izvorišta Ostrovica u Kulen Vakufu, radi njenog pakovanja (flaširanja) i prodaje na tržištu

Izjavitelj : Sakib Alijagić – šef odsjeka za privredu u Službi za finansije, privredu i poljoprivredu

Zulfikar Handukić – predsjednik Statutarne Komisije

Pravni osnov za donošenje prijedloga Odluke o davanju saglasnosti na samoinicijativnu ponudu za dodjelu koncesije privrednom društvu „Green Water“ d.o.o. Kulen Vakuf, Bihać za korištenje vode izvorišta Ostrovica u Kulen Vakufu, radi njenog pakovanja (flaširanja) i prodaje na tržištu, sadržan je u članu 5. stav (3) Zakona o koncesijama („Službeni glasnik Unsko-sanskog kantona“, broj 10/03, 7/09, 19/13, 9/17 i 18/19), kojim je propisano da u slučajevima kada Vlada Kantona odlučuje o dodjeli koncesije za određeno dobro na osnovu člana 3. ovog Zakona, odluku donosi Vlada Kantona, na prijedlog resornog ministra i uz prethodnu saglasnost općinskog vijeća na čijem se području nalazi koncesiono dobro ili općinskih vijeća ukoliko se koncesiono dobro nalazi na području više općina. Pravni osnov nalazi se i u članu 27. stav (1) istog Zakona, kojim je propisano da u slučaju da ponuđač ministarstvu podnese prijedlog za koncesiju za koju nije raspisan javni tender, Vlada Kantona, na prijedlog resornog ministarstva, a uz prethodnu saglasnost općinskog vijeća općine na čijem području se nalazi koncesiono dobro koje je predmet interesa za dodjelu koncesije, procjenjuje da li postoji javni interes za tu koncesiju na tom dobru i u članu 35. tačka g) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je utvrđena nadležnost Gradskog vijeća da u okviru samoupravnog djelokruga daje saglasnost na koncesije na način propisan zakonom.

Nakon razmatranja predložene Odluke, Komisija je istu prihvatila i prosljeđuje je Gradskom vijeću kako bi obavilo raspravu i zauzelo konačan stav.

Lejla Bakrač – zamjenica predsjednika Komisije za finansije i budžet

Nakon razmatranja predloženog materijala, Komisija je podržala donošenje Odluke o davanju saglasnosti na samoinicijativnu ponudu za dodjelu koncesije pošto postoji javni interes za tu koncesiju iz razloga što je „Green Water“ d.o.o. Kulen Vakuf, korisnik predmetnog objekta koji želi dovesti u punu ekonomsku funkciju privrednog razvoja i zapošljavanja, a čijim proizvodima bi snabdijevao tržište kako Grada Bihaća tako i Unsko-sanskog kantona i šireg regiona.

Davanjem saglasnosti, odnosno zaključivanjem Ugovora o koncesiji ostvarili bi se pozitivni finansijski efekti za Grad Bihać, koji bi se ogledali u plaćanju obaveza koncesionara po osnovu obračunatih naknada za dodijeljenu koncesiju za korištenje pitke vode izvorišta Ostrovica u Kulen Vakufu. U konkretnom slučaju, godišnja naknada koja se obračunava od prihoda ostvarenog korištenjem prirodnih bogastava, dobara u općoj upotrebi i obavljanja

djelatnosti od općeg interesa, a koja se naplaćuje za vrijeme trajanja ugovora o koncesiji ne može biti manja od 2,00% i raspoređuje se 60% u korist općine, a 40% u korist Kantona.

Kako nije bilo prijavljenih za raspravu, predsjedavajući predloženi materijal daje na usvajanje.

Prijedlog Odluke o davanju saglasnosti na samoinicijativnu ponudu za dodjelu koncesije privrednom društvu „Green Water“ d.o.o. Kulen Vakuf, Bihać za korištenje vode izvorišta Ostrovica u Kulen Vakufu, radi njenog pakovanja (flaširanja) i prodaje na tržištu usvojen sa 25 glasova „ZA“ – jednoglasno.

Ad.3.

Prijedlog Odluke o izmjenama i dopunama Odluke o davanju u zakup poslovnih prostora

Izvjestilac : Edina Zanačić ispred Službe za urbanističko planiranje, građenje, imovinsko – pravne i geodetske poslove

Zulfikar Handukić – predsjednik Statutarne Komisije

Pravni osnov za donošenje prijedloga Odluke o izmjenama i dopunama Odluke o davanju u zakup poslovnih prostora, sadržan je u članu 12. stav (3) tačka e) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“, broj 8/11), kojim je utvrđena nadležnost jedinice lokalne samouprave da utvrđuje politiku upravljanja i raspolaganja imovinom jedinice lokalne samouprave i članu 21. stav (1) tačka ć) istog Zakona kojim je utvrđena nadležnost vijeća da donosi odluke o upravljanju i raspolaganju imovinom jedinica lokalne samouprave, te članu 35. tačka j) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je utvrđena nadležnost Gradskog vijeća da, između ostalog, u okviru samoupravnog djelokruga donosi odluke o upravljanju i raspolaganju imovinom Grada.

Nakon razmatranja predložene Odluke, Komisija je istu prihvatila obzirom da izmjenama i dopunama Odluke rješavaju se pravne situacije na koje se nailazi u primjeni odredaba već važeće Odluke.

Komisija traži od predlagača da prije održavanja sjednice Gradskog vijeća, dostavi resornoj Službi osnovni tekst Odluke, odnosno izmjenu i dopunu Odluke, kako bi se adekvatno mogle pratiti predložene izmjene i dopune Odluke.

Komisija prosljeđuje predloženu Odluku Gradskom vijeću, na razmatranje i zauzimanje konačnog stava.

Lejla Bakrač – zamjenica predsjednika Komisije za finansije i budžet

Nakon razmatranja predloženog materijala, Komisija smatra da su predložene izmjene i dopune veoma realne, odnosno ako postoje slobodni prostori u vlasništvu Grada Bihaća potrebno je pružiti mogućnost i pravnim licima da mogu podnijeti zahtjev za neposrednu dodjelu poslovnog prostora, a nakon što je javno nadmetanje proglašeno bezuspješnim.

Komisija prosljeđuje predloženi materijal Gradskom vijeću, radi obavljanja rasprave i zauzimanja konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

Prijedlog Odluke o izmjenama i dopunama Odluke o davanju u zakup poslovnih prostora usvojen jednoglasno sa 25 glasova „ZA“.

Ad.4.

Prijedlog Odluke o utvrđivanju prosječne konačne građevinske cijene 1 m² korisne stambene površine na području grada Bihaća u 2022. godini

Izjavitelj : Mirela Delić – ispred Službe za urbanističko planiranje, građenje, imovinsko – pravne i geodetske poslove

Zulfikar Handukić – predsjednik Statutarne Komisije

Pravni osnov za donošenje prijedloga Odluke o utvrđivanju prosječne konačne građevinske cijene 1 m² korisne stambene površine na području grada Bihaća u 2022. godini, sadržan je u članu 66. Zakona o građevinskom zemljištu („Službene novine Federacije BiH“, broj 25/03, 16/04 i 67/05), kojim je propisano da kao osnovica za izračunavanje rente služi prosječna konačna građevinska cijena iz prethodne godine 1 m² korisne stambene površine na području općine – grada, te da prosječnu konačnu građevinsku cijenu 1 m² korisne stambene

površine utvrđuje Gradsko vijeće svake godine, a najkasnije do 31. marta tekuće godine, te u članu 35. tačka c) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je, između ostalih utvrđena nadležnost Gradskog vijeća za donošenje odluka i drugih općih akata kojima se uređuju pitanja iz samoupravnog djelokruga grada i daje njihovo tumačenje.

Obzirom da je predlagač u cjelosti proveo proceduru propisanu odredbama člana 66. Zakona o građevinskom zemljištu, ali nije uspio dobiti podatke o prosječnoj konačnoj građevinskoj cijeni 1 m² korisne stambene površine u 2022. godine od firmi iz Bihaća koje se bave izgradnjom i prodajom stanova za tržište, Komisija je prihvatila stav predlagača da se zbog teške ekonomske i finansijske situacije kao prosječna konačna građevinska cijena 1m² korisne stambene površine na području grada Bihaća u 2022. godini utvrdi iznos od 1.000,00 KM, a koja će služiti kao osnovica za obračun rente.

Komisija prosljeđuje predloženu Odluku Gradskom vijeću, kako bi o istoj obavilo raspravu i zauzelo konačan stav.

Lejla Bakrač – zamjenica predsjednika Komisije za finansije i budžet

Nakon razmatranja predloženog materijala, Komisija smatra da je prihvatljiva predložena cijena 1m² korisne stambene površine na području grada Bihaća za 2022. godinu.

Komisija prosljeđuje predloženi materijal Gradskom vijeću, radi obavljanja rasprave i zauzimanja konačnog stava.

Predsjedavajući vijeća otvara raspravu po predloženoj tački dnevnog reda.

Vijećnik Adnan Lipovača

Vijećnik navodi da smatra da je ovo odlična tačka ukoliko uzmemo u obzir da se u Gradu Bihaću već uveliko grade zgrade/ stanovi, referira se na činjenicu da se niko od vlasnika/ izvođača nije pojavio, a kada isti imaju problem, onda se obraćaju svima. Koristi priliku da postavi pitanje koliko se prije plaćala reta po m², te mu je izvjestioc odmah odgovorio da je cijena svake godine ista.

Vijećnik Hasan Fatkić

Vijećnik navodi da prodajna cijena m² nije ispravna, jer kod prodaje stana koji se napravi na tom m² vlasnik/izvođač zaradi puno više. Između ostalog konstatuje, da ukoliko Služba koja je nadležna za ove stvari smatra da je ovo uredu, da i on ,misli isto, ali ne želi da svi skupa

prave bilo kakvu štetu zajednici, ali smatra da se sve ponovno treba sagledati da se dokaže da je ovo realna cijena.

Vijećnik Adnan Mekić

Kao i njegovi prethodnici navodi da mu je jako žao što niti jedna izvođačka firma nije dostavila svoj prijedlog pomenute cijene niti informaciju. Također navodi da iako dijeli mišljenje da je ovo možda mala cijena, smatra da se možda stvari trebaju pregledati iz druge perspektive da je velika stanogradnja u Gradu Bihaću, što je i više nego dobro, pa zato smatra da bi cijena trebala ostati kako Grad povećanjem rente ne bi dobio kontraefekat tj manju stanogradnju.

Vijećnici Hasan Fatkić – replika

Repliku daje na diskusiju kolege Mekića, te navodi da ne želi da ga neko pogrešno razumije. Konstatuje da on uopšte nije protiv gradnje, niti da se tim ljudima koji grade uzimaju svi novci, ali da u ovom slučaju on situaciju sagledava iz ugla Grada Bihaća, jer su svi dužni da štite Budžet i sve ostalo, pogotovo ukoliko se uzme u obzir da niko od pomenutim vlasnika/izvođača nije dostavio svoj prijedlog cijene.

Nakon zatvaranja rasprave, predsjedavajući daje materijal na usvajanje.

Prijedlog Odluke o utvrđivanju prosječne konačne građevinske cijene 1 m² korisne stambene površine na području grada Bihaća u 2022. godini usvojen jednoglasno sa 25 glasova „ZA“.

Ad.5.

Prijedlog Odluke o izmjeni i dopuni Odluke o regulaciji saobraćaja na području grada Bihaća

Izvjestilac : Vildana Zulić – pomoćnik gradonačelnika za strateško planiranje, upravljanje projektima, komunalne djelatnosti, vode i zaštitu okoliša

Zulfikar Handukić – predsjednik Statutarne Komisije

Pravni osnov za donošenje prijedloga Odluke o izmjeni i dopuni Odluke o regulaciji saobraćaja na području grada Bihaća sadržan je u članu 2. Zakona o osnovama sigurnosti saobraćaja na cestama u Bosni i Hercegovini („Službeni glasnik BiH“, broj: 06/06, 75/06, 44/07, 84/09, 48/10, 18/13, 8/17, 89/17 i 9/18), kojim je propisano da će organi lokalne samouprave i lokalne uprave u gradovima i općinama osigurati provođenje Zakona i u okviru svoje nadležnosti donositi propise i preduzimati druge potrebne mjere za njegovo dosljedno provođenje i članu 35. tačka c) Statuta Grada Bihaća („Službeni glasnik Grada Bihaća“, broj 13/15, 13/18, 12/22), kojim je propisano da Gradsko vijeće, u okviru svoje nadležnosti, donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje.

Nakon razmatranja predložene Odluke, Komisija traži od predlagača da u roku od 30 dana od dana usvajanja Odluke pripremi prečišćeni tekst Odluke i isti u skladu s članom 167. Poslovnika Gradskog vijeća Bihać („Službeni glasnik Grada Bihaća“, broj: 3/16 i 4/20), dostavi Statutarnoj komisiji radi utvrđivanja prečišćenog teksta.

Komisija je prihvatila predloženu Odluku, te istu prosljeđuje Vijeću kako bi obavilo raspravu i zauzelo konačan stav po predloženom materijalu.

Lejla Bakrač – zamjenica predsjednika Komisije za finansije i budžet

Obzirom da su za obilježavanje taksi stajališta horizontalnom i vertikalnom signalizacijom, finansijska sredstva osigurana u Budžetu Grada Bihaća za 2023.godinu, Komisija za finansije i budžet predloženi materijal upućuje Gradskom vijeću, radi obavljanja rasprave i zauzimanja konačnog stava.

Asmir Budimlić – ispred Komisije za sigurnost i regulaciju saobraćaja Grada Bihaća

Nakon razmatranja predložene Odluke, Komisija traži od predlagača da u članu 22. tačka b) kod određivanja lokacije za taksi stajališta na javnim površinama u ulici Bedem, pri obilježavanju parking prostora za četiri stajališna mjesta, vodi računa da ista ne ometaju prilaz nesmetanom korištenju stambenih i poslovnih objekata na tom području.

Također, Komisija traži od predlagača da u Aneksu VII Naselja, ulice i trgovi za postavljanje posebnih objekata za smanjenje brzine kretanja vozila doda redni broj 52. koji glasi „52. Ulica Sarajevska na raskrsnici sa Ulicom Harmanska, sa obe strane prije obilježenih pješačkih prelaza.“

Komisija prosljeđuje predloženu Odluku Gradskom vijeću, kako bi o istoj obavilo raspravu i zauzelo konačan stav.

Predsjedavajući vijeća otvara raspravu po predloženoj tački dnevnog reda.

Vijećnik Edin Felić

Prije svega koristi priliku da pohvali Izvjestioca i sve druge ljude koji su sudjelovali u iznalaženju rješenja, a posebno rješenje za taksi stajališta u Gradu Bihaću. Navodi da je to aktuelni problem već godinama u ovom gradu, te da je i on sam bio involviran u rješavanje ovog problema, pa zbog toga želi da kaže da je izuzetno zadovoljan što se napokon uradilo nješto po ovom pitanju, te što će se jednim dobrim dijelom pomoći radu taksista u Bihaću, omogućiti im da se bolje i jednostavnije bave sa svojom esencijalnom djelatnošću. Navodi da danas kad se Odluka pogleda ona izgleda jako jednostavno, međutim da ljudi koji su bili involvirani u pravljenje iste, znaju koliko je to bilo teško. Želi da naglasi da je konačna Odluka rezultat rada i dogovora prije svega vlasnika taksi službi, ljudi iz JKP Komrad, same nadležne Službe unutar Gradske uprave, kao i jednog dijela vijećnika. Koristi posebnu priliku da se zahvali članovima i predsjedniku udruženja RVI koji su se također uključili u rješavanje ovog problema, pogotovo kada su u pitanju taksi stajališta na Trgu Maršala Tita, gdje su kroz razgovor svojevoljno ustupili taksistima jedan dio mjesta koji je predviđen za RVI, a za njih se mjesto kompenziralo na drugoj strani. Konstatuje da Grad Bihać na ovaj način dobija ukupni 43 parking mjesta za taksiste, što je odlično, te da će klub Stranke demokratske akcije podržati sa zadovoljstvom ovu Odluku. Također naglašava da mu je jako drago što je napokon Odlukom pronađeno rješenje za parking mjesta u Hošića mahali.

Vijećnik Adnan Lipovača

Navodi da podržava ovu odluku te također koristi priliku da se javno zahvali svima koji su učestvovali u pravljenju iste, jer ovakve Odluke uljepšavaju Grad Bihać. Navodi kako je najbitnije da su svi zadovoljni i da se konačno našlo odgovarajuće rješenje. Također konstatuje da mu je jako drago da je došlo do povećanja obima posla vezanih za prevoz u obliku taksi službi u Gradu Bihaću. Koristi priliku da naglasi da ukoliko bi nekad u budućnosti dolazilo do izmjene ili promjene stavki unutar ove Odluke da bi bilo dobro da razmišljamo da za razvoj taksi turizma je prijeko potrebno da se taksi stajališta nalaze na mjestima gdje je veća frekvencija ljudi, te da su u prošlom zahtjevu taksisti tražili da im se obezbjedi jedno mjesto preko puta Hotela Park, što vijećnik smatra da bi to bilo dobro, jer bi se na taj način zadovoljila kompletna struktura taksi stajališta u Gradu Bihaću. Napominje da u Hošića mahali ima problem vezan za parkinge, koji bi se mogao riješiti vinjetama, jer bi se na taj način

ograničio broj ljudi koji mogu na pomenuta parking mjesta parkirati. Koristi priliku da postavi pitanje, da li su planirana finansijska sredstva da se izradi vertikalna signalizacija u pomenutoj mahali. Koristi još priliku da izvjestioca obavijesti da u članu 20. alineja H postoje stvari koje su nejasne poput one gdje se naglašava da je određeno taksi stajalište u ulici Safet bega Bašagića, a ta ulica se preimenovala u ulicu Đačka, pa samo traži da se malo to isprovjerava.

Vijećnik Asmir Budimlić

U ime Komisije za sigurnost i regulaciju saobraćaja Grada Bihaća predlaže dva Amandmana na predloženu Odluku.

1.

I to da se u članu 22. tačka B kod određivanja lokacije za taksi stajalište na javnim površinama u ulici Bedem pri obilježavanju parking prostora za 4 stajališna mjesta vodi računa da ista ne ometa prilaz nesmetanom korištenju stambenih i poslovnih objekata na tom području

2.

U prijedlogu Odluke o izmjenama i dopuni Odluke o regulaciji saobraćaja na području grada Bihaća, u Aneksu VII NASELJA, ULICE I TRGOVI ZA POSTAVLJANJE POSEBNIH OBJEKATA ZA SMANJENJE BRZINE KRETANJA VOZILA, iz rednog broja 51., dodaje se novi redni broj 52., koji glasi:

„52. Ulica Sarajevska na raskrsnici sa Ulicom Harmanska, sa obe strane prije obilježenih pješačkih prelaza“.

Izvjestilac : Vildana Zulić – pomoćnica gradonačelnika za strateško planiranje, upravljanje projektima, komunalne djelatnosti, vode i zaštitu okoliša prihvata Amandmane.

Nakon zatvaranja rasprave, predsjedavajući daje materijal na usvajanje

Prijedlog Odluke o izmjeni i dopuni Odluke o regulaciji saobraćaja na području grada Bihaća (sa amandmanima) usvojen jednoglasno sa 26 glasova „ZA“.

Ad.6.

Prijedlog Odluke o izmjenama i dopunama Odluke o javnim parkiralištima na području grada Bihaća

Izvjestilac : Vildana Zulić – pomoćnica gradonačelnika za strateško planiranje, upravljanje projektima, komunalne djelatnosti, vode i zaštitu okoliša

Zulfikar Handukić – predsjednik Statutarne Komisije

Pravni osnov za donošenje prijedloga Odluke o izmjenama i dopunama Odluke o javnim parkiralištima na području grada Bihaća („Službeni glasnik Grada Bihaća“, broj: 12/21 i 12/22), sadržan je u članu 58. Zakona o komunalnim djelatnostima („Službeni glasnik USK“, broj 4/11, 11/11, 6/12, 13/12 i 14/17), kojim je, između ostalog, propisano da se posebnom općinskom odlukom reguliše obavljanje djelatnosti javnih parking prostora i članu 35. tačka c) Statuta Grada Bihaća („Službeni glasnik Grada Bihaća“, broj: 13/15, 13/18 i 12/22).

Nakon razmatranja predložene Odluke, Komisija traži od predlagača da u roku od 30 dana od dana usvajanja Odluke pripremi prečišćeni tekst Odluke i isti u skladu s članom 167. Poslovnika Gradskog vijeća Bihać („Službeni glasnik Grada Bihaća“, broj: 3/16 i 4/20), dostavi Statutarnoj komisiji radi utvrđivanja prečišćenog teksta.

Komisija prosljeđuje predloženu Odluku Gradskom vijeću, kako bi o istoj obavilo raspravu i zauzelo konačan stav.

Lejla Bakrač – zamjenica predsjednika Komisije za finansije i budžet

Nakon razmatranja predložene Odluke Komisija je podržala izmjene i dopune Odluke o javnim parkiralištima na području Grada Bihaća, osim prijedloga da se vozila sa stranim registarskim oznakama blokiraju uređajem za blokiranje točkova odnosno „liscama“.

Obzirom da za provođenje ove Odluke nije potrebno obezbijediti finansijska sredstva u Budžetu Grada Bihaća, Komisija prosljeđuje predloženi materijal Gradskom vijeću, radi obavljanja rasprave i zauzimanja konačnog stava.

Asmir Budimlić – ispred Komisije za sigurnost i regulaciju saobraćaja Grada Bihaća

Komisija traži od predlagača da u članu 4. predložene Odluke kojim se mijenja član 9. stav (2) i stav (4), Odluke o javnim parkiralištima na području grada Bihaća, iza stava (4) doda novi stav (5) koji glasi:

„(5) Vozila iz stava (2) moraju na vjetrobranskom staklu imati istaknut „parking sat“.

Također, u članu 5. predložene Odluke, kojim se mijenja član 18. stav (1) Odluke o javnim parkiralištima na području grada Bihaća, dodati stav (8) koji glasi:

„(8) Vozila iz stava (1) ove Odluke moraju na vjetrobranskom staklu imati istaknut „parking sat“.

Komisija prosljeđuje predloženu Odluku Gradskom vijeću, kako bi o istoj obavilo raspravu i zauzelo konačan stav.

Predsjedavajući vijeća otvara raspravu po predloženoj tački dnevnog reda.

Vijećnik Arnel Kozlica

Koristi priliku da izvjestiocu postavi pitanje vezano za izmjenu ove Odluke u dijelu gdje se u slučaju prekršaja propisanih Odlukom ne vrši blokiranje morotnog vozila nego da se isti sankcionišu izdavanjem prekršajnog naloga, osim u slučaju kada taj prekršaj učini vozač sa stranim registarskim oznakama, te pita da li to znači da se pomenuti ne mogu nikako kazniti ilo se blokiraju na dosadašnji način. A drugo vijećnikovo pitanje vezano je za parking mjesta za ratne vojne invalide Grada Bihaća u dijelu zloupotrebe ovih mjesta, da se parking ograničava na 2 sata – pa vijećnika zanima da li je uredu da se ovo ograničava i da li se organizacije RVI slažu sa ovom ovakvom Odlukom, vijećnik navodi da smatra da ograničavanje nije uredu.

Vijećnik Hasan Fatkić

Navodi da se u dijelovima slaže sa kolegom Kozlicom kada navodi da nije uredu da se RVI parking ograničava na dva sata, te da ukoliko su im dozvoljena parking mjesta, neka oni odluče koliko će se na istima zadržati, a ne da mi to odlučujemo. Vijećnik traži izmjenu ovog postojećeg člana Odluke te da se on drugačije definiše. Također navodi da mu je sporan član 5. ove Odluke gdje su pobrojani određeni dobitnici najviših ratnih priznanja kao osobe koje imaju određene beneficije, ali vijećnik smatra da nisu pobrojana sva odlikovanja i pita šta je sa ostalim dobitnicima najviših priznanja te zašto oni nisu uvršteni, (kao npr dobitnici medalja za hrabrost, dobitnika srebrnog štita itd.) ovo naziva diskriminacijom, te traži da se Odluka izmjeni i da se uvredu sva priznanja koja postoje, te da ti ljudi imaju beneficije.

Vijećnik Adnan Lipovača

Koristi priliku da prvo uputi čestitke i zahvale i direktoru JKP Komrad kao i pomoćnici gradonačelnika Vildani Zulić kao i svima koji su radili i inicirali da se ova Odluka nađe na Gradskom vijeću, te da u skladu sa Europskim standardima oslobodimo ljude na području Bihaća od nelegalnog blokiranja vozila. Vijećnik navodi da je ovu inicijativu podnio još u maju mjesecu 2021. godine i u istoj naveo odredbe Europske Komisije o zaštiti ljudskih prava i kako blokiranje bilo čije imovine je neustavno. Smatra da je odlično što se preuzeo modalitet iz grada Živinica i Banovića, kako da se poveća i sama naplata parkinga a da se smanji rizik za same radnike, jer samo blokiranje/deblokiranje vozila ne prođe uvijek bez problema. Koristi priliku da još jednom iskaže svoju zahvalnost svima, a posebno pomoćniku Ministra koji je dao dozvolu JKP Komrad Bihać da može naplaćivati kazne, tj da mogu izdati prekršajne naloge. Između ostalog konstatira da bi se trebala javnost upoznati sa usvajanjem ove Odluke te i da se traži i zahtjeva ažurno plaćanje. Također se nadovezuje na temu za auta sa stranim registarskim oznakama i njihovo blokiranje, smatra da će se ipak morati naći način da se ovo riješi bez lisica, a primjer toga jeste Grad Banja Luka koji napišu prekršajni nalog bez obzira odakle je vlasnik auta. Koristi priliku da postavi pitanje vezano za član 10. oko prekršajnih naloga i novčanih kazni, da li će radnik JKP Komrad imati mogućnost naplate kazne na licu mjesta. Vijećnik daje punu podršku za ovaj materijal.

Vijećnik Adnan Mekić

Vijećnik navodi da se Grad već godinama bori sa problemom blokiranja vozila lisicama, te da on kada je u stranoj zemlji itetkako pazi gdje će se parkirati i kako, navodi da je sve stvar navike i prilagođavanja na plaćanje parkinga, jer su građani Grada Bihaća navikli već da se švercaju po privatnim parkinzima od zgrada, kuća itd.

Vijećnik Šefik Kličić

Želi da upozna vijećnike sa situacijom da je 10.05.2023.godine dobio poziv od uposlenika Osnovne škole Harmani II, da je na kapiji ove škole parkirano vozilo, koje stoji na tom mjestu parkirano punih 10 dana, bili su pozvali i uposlenici JKP Komrad i pripadnici MUP-a USK, međutim auto je i dalje stajalo na istom mjestu. Vijećnik navodi da su upravo ovo problemi koji se moraju rješavati, tj problem je nemogućnost premještanja vozila koje nije adekvatno parkirano. Drugi primjer koji navodi jeste problem uposlenika Suda u Bihaću, koji kako kaže vijećnik u toku dana minimalno 5 puta mora premještatati svoje vozilo iako je invalid. Upravo

ovim primjerima vijećnik želi da prikaže problematiku nemanja „pauk“ služe za premještanje auta, jer bi se u tim situacijama svi puno drugačije ponašali.

Vijećnik Emir Mujadžić

Vijećnik prije svega želi da se zahvali ljudima koji su radili na ovoj Odluci, međutim vijećnik smatra da ova Odluka ipak treba ići na dodatnu doradu, posebno u dijelu ograničavanja parkinga za Ratne vojne invalide. Također smatra da pripadnici ove skupine zbog svega što su dali od sebe, moraju imati pravo parkinga ukoliko žele i na 24/7. Također smatra da nije dobar član u Odluci gdje se blokiraju vozila sa stranim tablama, jer kako navodi ima puno ljudi i u Gradu Bihaću koji žive ovdje, a voze auto sa stranim tablama, a u saobraćaju su svi jednaki.

Vijećnik Alen Zulić

Vijećnik navodi da se slaže za kolegama oko greške u Odluci da se ograničava vrijeme ratnim vojnim invalidima, kao i o blokiranju auta sa stranim tablama putem lisica, međutim svjestan je da za ovu drugu stvar nema trenutno drugačijeg rješenja, posebno jer nemamo pristup informacijama iz Europske unije ili neke druge zemlje. Koristi priliku da ispred kluba POMAK- a predloži pauzu, kako bi skupa sa izlagačem materijala svi došli do rješenja koje odovara svima.

Vijećnik Edin Felić

Navodi da su baš ovo primjeri onih Odluka gdje se svi moraju potruditi da se iznađe što bolje rješenje. Vijećnik navodi da se već nekoliko dana unazad bavi upravo ovom problematikom tj. ovom tačkom jer je evidentno da u samoj Odluci postoji nekoliko problema. Navodi da se pokrenula rasprava o tome da li jedne kažnjavamo a druge ne kažnjavamo donošenjem ove Odluke, ali se vijećnik čudi zašto niko od njegovih kolega nije spomenuo, a to je likvidnost i solventnost JKP Komrad, tj. redovno isplaćivanje plata u tom preduzeću, jer kako vijećnik kaže najlakše bi bilo izaći za govornicu u toku sjednice reći „da se traži od Gradonačelnika da svi parkinzi s obzirom da smo mi turistički grad budu slobodni i besplatni“, ali to je nemoguće. Između ostalog navodi da od nikog za govornicom nije čuo konkretno rješenje, nego se samo naziru moguća/potencijalna rješenja problema koji je evidentan. Vijećnik smatra da se ne može od parkinga u Gradu Bihaću praviti lakrdija od koje će svi raditi šta žele. Navodi isto tako, da ke dobio informacije kako upravo auta sa stranimj registarskim tablama krše mnoštvo zakona u saobraćaju na području Grada Bihaća, upravo zbog činjenice

da ti isti vozači znaju da mi nemamo mehanizme kao u Europi da ih na kvalitetan način kaznimo. Između ostalog navodi sve ljude sa kojima je stupio u kontak kako bi pokušao pronaći bilo koga ko ima neko bolje potencijalno rješenje i došao je do zaključka da JKP Komrad Bihać nema drugog načina da naplati prekršaje koje počine auta sa stranim tablicama. Smatra da je jako bitno danas donijeti ovu Odluku, ali kao i kolega Zulić smatra da bi trebalo oodvojiti vremena za pauzu, jer smatra da se ova Odluka može doraditi na licu mjesta. Također navodi da je stupio u kontakt i sa Udruženjem RVI koji su ga zamolilo da im se vrijeme parkinga ne ograničava, iako je sam vijećnik svjestan da se iste te invalidske kartice zloupotrebljavaju. Prijedlog vijećnika Felića jeste da se skine ograničenje od „2 sata“ te da se zamole Udruženja RVI da oni pomognu. Također se dotiče činjenice da svi mi volimo svoju državu, ali se isto tako trudimo da se ne pridržavamo zakona, jer čim pređemo granicu, poštujemo sva pravila, od ne bacanja smeća do plaćanja parkinga i svega ostalog. Također se slaže sa vijećnom Fatkićem ukoliko su se određenja priznanja propustila, da se ista trebaju dodati, jer vjeruju da tih ljudi nema puno. Tvrdi da bi bilo dobro da u 6 mjeseci svi donesu svoje prijedloge JKP Komrad o rješenjima određenih situacija koje su istom preduzeću sporne.

Vijećnik Edin Goretić

Između ostalog navodi da je u potpunosti protiv bilo kakvog blokiranja vozila putem lisica, te navodi svoj primjer koji mu se desio kada je bio na putu u Republici Hrvatskoj. Upravo zbog tog primjera vijećnik smatra da je ovo ipak jedini način za sankcionisanje, ali ukoliko bi svi pazili i držali se propisa ne bismo imali problema.

Izvjestilac : Vildana Zulić – pomoćnica gradonačelnika za strateško planiranje,upravljanje projektima,komunalne djelatnosti,vode i zaštitu okoliša dala dodatna pojašnjenja i odgovorila u izlaganju na sva postavljena pitanja, te izvjestila da je predlagач prihvatio amandman Komisije za sigurnost i regulaciju saobraćaja Grada Bihaća kao i zajednički Amandman klubova koji glasi:

1.) Amandman na Prijedlog Odluke o izmjenama i dopunama Odluke o javnim parkiralištima na području grada Bihaća

U prijedlogu Odluke o izmjenama i dopunama Odluke o javnim parkiralištima na području grada Bihaća, u članu 4., kojim se mijenja član 9. stav (2) Odluke o javnim parkiralištima na području grada Bihaća („Službeni glasnik Grada Bihaća“, broj 12/21 i 12/22), riječ „dva“ zamijeniti sa riječju „četiri“.

U članu 5. prijedloga Odluke o izmjenama i dopunama Odluke o javnim parkiralištima na području grada Bihaća, kojim se mijenja član 18. stav (1) Odluke o javnim parkiralištima na području grada Bihaća („Službeni glasnik Grada Bihaća“, broj 12/21 i 12/22), riječi „dva“ zamijeniti sa riječju „četiri“.

2) U prijedlogu Odluke o izmjenama i dopunama Odluke o javnim parkiralištima na području grada Bihaća, u članu 4., kojim se mijenja član 9. stav (2) i stav (4) Odluke o javnim parkiralištima na području grada Bihaća („Službeni glasnik Grada Bihaća“, broj 12/21 i 12/22), dodaje se novi stav (5) koji glasi:

„(5) Vozila iz stav (2) ove Odluke moraju na vjetrobranskom staklu imati istaknut parking sat“.

U članu 5. prijedloga Odluke o izmjenama i dopunama Odluke o javnim parkiralištima na području grada Bihaća, kojim se mijenja član 18. stav (1) Odluke o javnim parkiralištima na području grada Bihaća („Službeni glasnik Grada Bihaća“, broj 12/21 i 12/22), dodaje se novi stav (8) koji glasi:

„(8) Vozila iz stava (1) ove Odluke moraju na vjetrobranskom staklu imati istaknut „parking sat“.

Nakon zatvaranja rasprave, predsjedavajući daje materijal na usvajanje

Prijedlog Odluke o izmjenama i dopunama Odluke o javnim parkiralištima na području grada Bihaća (sa amandmanom) usvojen jednoglasno sa 24 glasa „ZA“

Ad.7.

Prijedlog Zaključka o davanju saglasnosti na Pravilnik o radu Javnog preduzeća „Aerodrom Bihać“ d.o.o. Bihać

Izvjestilac : Anel Hadžić – direktor JP „Aerodrom Bihać“

Zulfikar Handukić – predsjednik Statutarne Komisije

Pravni osnov za donošenje Pravilnika o radu Javnog preduzeća „AERODROM BIHAĆ“ d.o.o. Bihać, sadržan je u članu 118. Zakona o radu („Službene novine Federacije BiH“, broj 26/16, 89/18 i 44/22), kojim je propisano da poslodavac koji zapošljava više od 30 radnika donosi i objavljuje pravilnik o radu, kojim se uređuju plaće, organizacija rada, sistematizacija radnih mjesta, posebni uslovi za zasnivanje radnog odnosa i druga pitanja značajna za radnika i poslodavca, u skladu sa zakonom i kolektivnim ugovorom. Pravni osnov sadržan je i u članu 87. stav (2) Statuta Javnog preduzeća, kojim je propisano da Skupština Preduzeća može, na prijedlog Nadzornog odbora i direktora, donijeti odluku da se Pravilnikom o radu reguliraju unutrašnja organizacija, sistematizacija, plate radnika i disciplinska odgovornost, članu 90. stav (2) Statuta JP koji propisuje da Pravilnik o radu donosi Skupština Preduzeća, po prijedlogu Nadzornog odbora u saradnji sa direktorom i uz saglasnost Osnivača po proceduri propisanoj ovim Statutom, te članu 132. tačka b) Poslovnika Gradskog vijeća Bihać („Službeni glasnik Grada Bihaća“, broj 3/16 i 4/20), kojim je utvrđeno da Vijeće daje saglasnost ili potvrđuje pojedine akte kada je to propisom određeno.

Nakon razmatranja predloženog materijala, Komisija traži od predlagača da u članu 18. stav (3) tačka c) alineja 3) brojčanu oznaku „3,05“ zamijeni s brojčanom oznakom „3,50“, odnosno u alineji 5) brojčanu oznaku „4,49“ zamijeni s brojčanom oznakom „4,99“.

Također; Komisija traži od predlagača da u nazivu člana 101. briše riječi „povodom vjerskih, nacionalnih i državnih praznika“, odnosno da briše stav (1) istog člana, obzirom da pravilnici o radu i drugih javnih preduzeća čiji je Osnivač Grad Bihać nemaju propisanu takvu vrstu naknade.

Komisija prosljeđuje predloženi materijal Gradskom vijeću, kako bi o istom obavilo raspravu i zauzelo konačan stav.

Lejla Bakrač – zamjenica predsjednika Komisije za finansije i budžet

Obzirom da se radi o zakonskoj obavezi donošenja Pravilnika o radu JU „Aerodrom Bihać“, te da za provođenje ovog Zaključka o davanju saglasnosti, nije potrebno obezbijediti finansijska sredstva u Budžetu Grada Bihaća, Komisija je prihvatila predloženi materijal i isti upućuje Gradskom vijeću, radi obavljanja rasprave i zauzimanja konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

Prijedlog Zaključka o davanju saglasnosti na Pravilnik o radu Javnog preduzeća „Aerodrom Bihać“ d.o.o. Bihać usvojen sa 16 glasova „ZA“ i 5 glasova „SUZDRŽAN“.

Ad.8.

Prijedlog Zaključka o davanju saglasnosti za davanje u zakup poslovne prostorije Kulturno umjetničkom društvu „BEDEM“ Bihać

Izvjestilac : Edina Zanačić ispred Službe za urbanističko planiranje, građenje, imovinsko – pravne i geodetske poslove

Zulfikar Handukić – predsjednik Statutarne Komisije

Pravni osnov za donošenje prijedloga Zaključka o davanju saglasnosti za davanje u zakup poslovne prostorije Kulturno umjetničkom društvu „BEDEM“ Bihać, sadržan je u članu 35. tačka j) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je utvrđena nadležnost gradskog vijeća, da u okviru samoupravnog djelokruga, donosi odluke o upravljanju i raspolaganju imovinom Grada i članu 15. stav (1) Odluke o davanju u zakup poslovnih prostora („Službeni glasnik Grada Bihaća“, broj 15/17 i 12/19), kojim je propisano da se davanje u zakup poslovnih prostora u vlasništvu Grada Bihaća vrši neposrednom dodjelom uz saglasnost Gradskog vijeća, i to: političkim strankama, udruženjima, organizacijama i vjerskim zajednicama, organima i institucijama Države Bosne i Hercegovine, Federacije Bosne i Hercegovine, Kantona i Grada Bihaća, mjesnim zajednicama, te javnim preduzećima i ustanovama čiji je osnivač Grad Bihać.

Nakon razmatranja predloženog Zaključka, Komisija je isti prihvatila i prosljeđuje ga Vijeću, na razmatranje i zauzimanje konačnog stava.

Lejla Bakrač – zamjenica predsjednika Komisije za finansije i budžet

Obzirom da je izražen obostran interes, da se prostor kojim raspolaže Grad Bihać stavi u upotrebu i funkciju, te da će se realizacijom Zaključka, povećavati prihodi Grada Bihaća, Komisija je prihvatila predloženi materijal i prosljeđuje ga Gradskom vijeću, na razmatranje i zauzimanje konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

Prijedlog Zaključka o davanju saglasnosti za davanje u zakup poslovne prostorije Kulturno umjetničkom društvu „BEDEM“ Bihać usvojen jednoglasno sa 23 glasa „ZA“.

Ad.9.

Prijedlog Zaključka o prihvatanju „Platforme za mir“ i „Plana aktivnosti za implementaciju Platforme za mir 2018.-2022. Organizacije civilnog društva“

Izjavitelj : Elmedin Mehadžić – šef odsjeka za mjesne i vjerske zajednice u Službi za poslove kabineta i mjesne zajednice

Zulfikar Handukić – predsjednik Statutarne Komisije

Pravni osnov za donošenje predloženog Zaključka sadržan je u članu 19. Statuta Grada Bihaća („Službeni glasnik Grada Bihaća“, broj:13/15, 13/18 i 12/22), kojim je propisano da u obavljanju poslova iz svoje nadležnosti Grad Bihać će stvarati uvjete da građani na području grada u cjelini i na demokratski način ostvaruju sva prava i slobode utvrđene odredbama člana II.A. do 7. Ustava Federacije Bosne i Hercegovine i međunarodnim instrumentima sadržanim u Aneksu Ustava Federacije, o čemu će brinuti svi gradski organi i institucije, svako u okviru svoje nadležnosti.

Pravni osnov sadržan je i u članu 28. stav (1) tačka a) Statuta, kojim je propisano da Grad Bihać u svom samoupravnom djelokrugu obavlja poslove kojima se neposredno ostvaruju potrebe građana, između ostalog, osiguranje uvjeta i poduzimanje svih potrebnih mjera za dosljednu primjenu, poštivanje i zaštitu ljudskih prava i osnovnih sloboda u skladu sa Ustavom BiH, Ustavom FBiH i Ustavom Unsko-sanskog kantona, te članu 132. tačka a) Poslovnika Gradskog vijeća Bihać („Službeni glasnik Grada Bihaća“ broj 3/16 i 45/20), kojim je utvrđeno da Vijeće Zaključkom zauzima stavove i izražava mišljenje o pitanjima o kojima je raspravljalo.

Komisija je prihvatila predloženu Platformu, ali traži od predlagača da koriguje preambulu predloženog Zaključka na način da glasi:

„Na osnovu člana 19., a u vezi sa članom 28. stav (1) tačka a) Statuta Grada Bihaća („Službeni glasnik Grada Bihaća“, broj 13/15, 13/18 i 12/22) i člana 132. tačka a) Poslovnika

Gradskog vijeća Bihać („Službeni glasnik Grada Bihaća“, broj 3/16 i 4/20), Gradsko vijeće Bihać na 33. sjednici, održanoj dana 24.05.2023. godine, donijelo je:“

Komisija prosljeđuje predloženi Zaključak Gradskom vijeću, radi obavljanja rasprave i zauzimanja konačnog stava.

Lejla Bakrač – zamjenica predsjednika Komisije za finansije i budžet

Obzirom da za provođenje ove Odluke nije potrebno obezbijediti finansijska sredstva u Budžetu Grada Bihaća, Komisija prosljeđuje predloženi materijal Gradskom vijeću, radi obavljanja rasprave i zauzimanja konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

Prijedlog Zaključka o prihvatanju „Platforme za mir“ i „Plana aktivnosti za implementaciju Platforme za mir 2018.-2022. Organizacije civilnog društva“ usvojen jednoglasno sa 21 glasom „ZA“.

Ad.10.

Prijedlog Rješenja o utvrđivanju liste promjenljivih članova Komisije za koncesije USK-a za područje Grada Bihaća

Izjavitelj : Sakib Alijagić – šef odsjeka za privredu u Službi za finansije, privredu i poljoprivredu

Zulfikar Handukić – predsjednik Statutarne Komisije

Pravni osnov za donošenje predloženog Rješenja sadržan je u članu 8. stav (2) i (3) Zakona o koncesijama („Službeni glasnik Unsko-sanskog kantona“, broj 10/03, 7/09, 19/13, 9/17 i 18/19), kojim je propisano da „kada se pokreće postupak za dodjelu koncesija u skladu sa članom 5. stav (3) ovog Zakona, Komisija broji pet članova kada se koncesiono dobro nalazi na području jedne općine, a ukoliko se koncesiono dobro nalazi na području više općina, onda svaka od tih općina participira u radu komisije sa svoja dva člana. Tri člana komisije su stalni članovi koji se imenuju u skladu sa članom 9. stav (1) ovog Zakona, a ostali

članovi su promjenljivi i imenuju ih resorni ministri sa liste dostavljene od strane općinskih vijeća na čijoj teritoriji se nalazi predmet koncesije. Lista općinskog vijeća mora sadržavati najmanje šest istaknutih stručnjaka u lokalnoj sredini iz oblasti prava, ekonomije i inženjerstva i na njih se primjenjuju ograničenja predviđena u članu 9. stav (3), (4) i (6).

Pravni osnov nalazi se i u članu 35. tačka bb) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je utvrđena nadležnost Gradskog vijeća da u okviru samoupravnog djelokruga imenuje, bira i razrješava druge osobe određene zakonom, Statutom i odlukama, te daje saglasnost na imenovanja, izbor i razrješenja u skladu sa zakonom.

Komisija prosljeđuje predloženo Rješenje Gradskom vijeću, kako bi o istom obavilo raspravu i zauzelo konačan stav.

Lejla Bakrač – zamjenica predsjednika Komisije za finansije i budžet

Nakon razmatranja predloženog materijala, Komisija za finansije i budžet je jednoglasno prihvatila obrazloženje predlagača o razlozima za donošenje Rješenja o utvrđivanju liste promjenjivih članova Komisije za koncesije USK-a za područje Grada Bihaća.

Obzirom da su za donošenje ovoga Rješenja obezbijedena finansijska sredstva u Budžetu Grada Bihaća, Komisija prosljeđuje predloženi materijal Gradskom vijeću, radi obavljanja rasprave i zauzimanja konačnog stava.

Hasan Babić –predsjednik Komisije za izbor i imenovanje

Nakon razmatranja predloženog Rješenja, a imajući u vidu da su ispoštovane sve zakonom propisane procedure, Komisija je prihvatila predloženi materijal, te ga prosljeđuje Gradskom vijeću, radi obavljanja rasprave i zauzimanja konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

Prijedlog Rješenja o utvrđivanju liste promjenjivih članova Komisije za koncesije USK-a za područje Grada Bihaća usvojen sa 23 glasa „ZA“ i 2 glasa „SUZDRŽAN“.

Ad. 11.

- **Prijedlog Rješenja o razrješenju predsjednika Nadzornog odbora JP „Aerodrom Bihać“ d.o.o. Bihać**
- **Prijedlog Rješenja o imenovanju na kraći period predsjednika Nadzornog +odbora JP „Aerodrom Bihać“ d.o.o. Bihać**

Izvjestilac : Sakib Alijagić – šef odsjeka za privredu u Službi za finansije, privredu i poljoprivredu

Zulfikar Handukić – predsjednik Statutarne Komisije

a) Prijedlog Rješenja o razrješenju predsjednika Nadzornog odbora JP „Aerodrom Bihać“ d.o.o. Bihać

Pravni osnov za donošenje prijedloga Rješenja o razrješenju predsjednika Nadzornog odbora JP „Aerodrom Bihać“ d.o.o. Bihać, sadržan je u članu 43. stav (1) tačka 5) Statuta Javnog preduzeća „Aerodrom Bihać“ d.o.o. Bihać („Službeni glasnik Grada Bihaća“, broj 14/15 i 15/22), kojim je propisano da Osnivač može razriješiti predsjednika i članove Nadzornog odbora i prije isteka razdoblja na koje su imenovani, između ostalog, na lični zahtjev (ostavkom), te članu 35. tačka bb) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je utvrđena nadležnost Gradskog vijeća da u okviru samoupravnog djelokruga imenuje, bira i razrješava druge osobe određene zakonom, Statutom i odlukama, te daje saglasnost na imenovanja, izbor i razrješavanja u skladu sa zakonom.

b) Prijedlog Rješenja o imenovanju na kraći period predsjednika Nadzornog odbora JP „Aerodrom Bihać“ d.o.o. Bihać

Pravni osnov za donošenje prijedloga Rješenja o imenovanju na kraći period predsjednika Nadzornog odbora JP „Aerodrom Bihać“ d.o.o. Bihać, sadržan je u članu 4. stav (2) Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije Bosne i Hercegovine“, broj 12/03, 34/03 i 65/13), koji predstavlja izuzeće u primjeni Zakona, u smislu da se imenovanje na kraći period, odnosno na period koji ne može biti duži od 3 (tri) mjeseca, vrši bez objavljivanja javnog oglasa odnosno javnog konkursa, te članu 35. tačka bb) Statuta Grada Bihaća („Službeni glasnik Grada Bihaća“, broj 13/15, 13/18 i 12/22), kojim je utvrđena nadležnost Gradskog vijeća da u okviru samoupravnog djelokruga imenuje, bira i razrješava druge osobe određene zakonom, Statutom i odlukama, te daje saglasnost na imenovanja, izbor i razrješavanja u skladu sa zakonom.

Komisija prosljeđuje predložena rješenja Gradskom vijeću, kako bi o istim obavilo raspravu i zauzelo konačan stav.

00

Lejla Bakrač – zamjenica predsjednika Komisije za finansije i budžet

Obzirom da predsjednik i članovi Nadzornog odbora imaju pravo na naknadu u skladu sa zaključenim Ugovorom kojeg odobrava Skupština, a isplaćuje Javno preduzeće, Komisija podržava, te prosljeđuje predloženi materijal Gradskom vijeću, radi obavljanja rasprave i zauzimanja konačnog stava.

Hasan Babić – predsjednik Komisije za izbor I imenovanje

Obzirom da se radi o imenovanju na kraći period Komisija prihvata obrazložene razloge i podržava prijedlog Rješenja o imenovanju predsjednika Nadzornog odbora JP „Aerodrom Bihać“, te predloženi materijal prosljeđuje Gradskom vijeću, radi obavljanja rasprave i zauzimanja konačnog stava.

Kako nije bilo prijavljenih za raspravu, predsjedavajući predloženi materijal daje na usvajanje.

- Prijedlog Rješenja o razrješenju predsjednika Nadzornog odbora JP „Aerodrom Bihać“ d.o.o. Bihać**
- Prijedlog Rješenja o imenovanju na kraći period predsjednika Nadzornog odbora JP „Aerodrom Bihać“ d.o.o. Bihać usvojen sa 18 glasova „ZA“ i 4 glasa „SUZDRŽAN“**

Predsjedavajući vrši prozivku, te zaključuje da je prisutno 26 vijećnika.

Predsjedavajući zatvara sjednicu u 18:00h.

*Predsjedavajući Gradskog vijeća
Zulfikar Handukić, s.r.*